

萬 有 文 庫

第二集七種

王 雲 五 主 編

明 詩 紀 事

(十三)

陳 田 輯

商 務 印 書 館 發 行

明詩紀事

(十三)

陳田輯

國學基本叢書

編主五雲王  
庫文有萬  
種百七集二第  
事紀詩明  
册十三

中華民國二十五年九月初版

嚴翁朱

編輯者 陳 田

發行人 王 雲 五  
上海河南路

印刷所 商 務 印 書 館  
上海河南路

發行所 商 務 印 書 館  
上海及各埠

# 明詩紀事卷二十九

## 辛籤

王屋一首

屋字孝峙。初名晚。字蘭九。嘉善人。有學可齋詩箋。

靜志居詩話。孝峙以詩受知魏忠節。因與忠節一門羣從和酬。詩類劉改之。詞學辛幼安。嘗過同里曹學士齋。學士曰。先生尙能著屐遠步耶。應曰。有太史公不可無牛馬走。鄉里傳爲新語。

魏塘詩陳。孝峙孤貧無家。託身於郡大姓。好爲詩。顧艾見而賞之。載與俱歸。爲延譽。爲人修髯美丰神。工草隸。善滑稽。邑薦紳皆樂與之交。

## 子夜歌

阿翁將嫁女。問女願誰歸。富室多爭寵。貧家常苦饑。

## 顧艾一首

艾字病已。一字匏青。嘉善人。有勸影齋。自淺齋二集。

魏塘詩陳。病已與魏忠節父子比鄰友善。持論未嘗苟合。忠節稱其端士。工詩歌。家貧郭。被褐藜藿。日中往往不舉火。然門外多長者車轍。遊郡城。見王屋詩。愛其才。召與同居。至共衣食。廣爲延譽。屋遂得與邑士大夫交。其論詩。不必摹擬。摹擬合則神。

情離。如建章千門萬戶。不襲阿房故址。新豐締造。徒欺田舍翁耳。持論甚精。既引王屋交於邑士夫。邑士夫憚病已剛。樂與屋交。屋晚起家爲富翁。而病已家益貧。苦吟歲爲詩以百計。未嘗有所干於人。曹宗伯勳作贈王屋詩云。猶勝桐村顧病已。饑腸空煮蠶魚羹。

秋葉

秋葉離披飲淚痕。青紅間色映柴門。吹殘將次孤巢影。落盡無由庇本根。詎怨霜風今已甚。反嫌雨露昔多恩。天涯何處容憔悴。敢託寒爐此夜溫。

陳衍二首

衍字磐生。閩人。有大江集。

靜志居詩話。磐生與徐與公同入曹能始閩風樓詩社。而賦才濡鈍。光焰鬱而不舒。其自序比於春草蔓生。秋蟲孤響。良亦自得之言。

十五國風高言集。田鬻淵曰。磐生詩。風姿搖曳。意態芊緜。有落花依草之致。

題邵大行薰亭

一片蒼山落案前。亭亭孤塔影嬋娟。林花乍落猶含露。池水新生卽有煙。蜨趁侍兒登佛閣。鶴隨門客上漁船。清光盡貯軒庭內。獨榻拋書抱石眠。

上報國寺毘盧閣

十丈青蓮朵朵開。昆盧高閣獨崔嵬。欲看山勢連天遠。已見河流帶雨來。宮樹陰濃秋未落。塞鴻聲斷晚猶哀。烽煙直北何時息。處處關門鼓角催。

王履和二首

履和字仲美。邢臺人。諸生。

香山寺

金繩經百轉。咫尺近清涼。老樹經秋醉。馴禽與客忘。雲來千澗沒。雨過一山香。每到無生地。翻愁返故鄉。

懷恨歌

情多易起惱。歡久自生悲。棄妾妾不恨。恨郎愛妾時。

麻三雍一首

三雍字仲雍。宣城諸生。

怨王孫

灼灼嬌花解媚人。萋萋芳草獨傷神。那因芳草偏成恨。自是嬋娟不奈春。

吳一元一首

一元字堯開。宣城諸生。

贈顧二娘

聞酒青樓繫玉驄。梅花春伴小橋東。縱來歷亂猶堪惜。不學山蹊桃杏紅。

何絳三首

絳字不借。一字孟門。廣東順德人。有不去廬稿。

廣東詩粹。不借與陶璜。梁槌。陳恭尹暨其兄衡。讀書西樵山中。世稱北田五子。

嶺表詩傳。孟門於古體不喜李杜。故卒少變化。惟五律最工起手。

送黎雨亭再之惠州

非余偏惜別。君去亦淒然。霜葉臨江樹。秋風下瀨船。書期長至後。歸訂未行先。草戀西湖柳。依依婀娜前。

十四夜與吳山帶任肇楚蒼筤樓看月

涼風起中夜。爲客動高吟。與子詠明月。誰人知賞心。佳辰驚節序。方外散幽襟。轉惜分攜後。寒江白露深。

郊居

郊西日將夕。鳥雀何嘒嘒。好月來平野。微風過暮鐘。草衰寬石路。木落出寒峯。觀此芳菲盡。悠然思嶺松。

梁槌一首

槌字器圃。廣東順德人。諸生。

陳恭尹獨漉堂集。器圃弱冠補諸生有聲。運會遷移。盛年自廢。結茅池西。扁曰寒塘。懸板橋以限往來。非其人不得入也。好讀書。晝夜不釋卷。興之所至。扁舟獨往。旬月忘返。近郡名山羅浮。西樵。歲必一再登。天性高潔。然不能獨居。無朋友則不樂。偶不至。則輕裝就之。高談雄論。觸緒英發。遇世俗人。終日不作一語。人初以爲傲。久而親之。知其無他也。爲詩力追中唐。沖澹有自得之致。

### 送何不偕之潮州

擾擾不得志。客心安可論。古關羸馬路。窮海惡魚津。驛葉行邊落。籬花到日新。遨遊無不可。天地一閒人。

### 岑徵二首

徵字金紀。一字霍山。南海人。諸生。有選選樓集。

### 蒼梧

日月開虞代。風聲變五絃。牂牁流不返。南狩是何年。瘴雨摧籬芷。東風怨杜鵑。容華銷旅食。淚盡百蠻天。

### 湖南秋興

一雁下平蕪。天空楚月孤。西風吹落葉。秋色在南湖。欲學長沙傅。投書屈大夫。三湘哀怨地。懷古獨躊躇。

### 易訓一首

訓字宣人。新會人。有東樵遺稿。

廣東詩粹。宣人性狷介。嘗往匡山。倚哀歌亭。放聲大哭。後適蒼梧。得瘴疾卒。



送一公還山

師今何處去。相送出林間。一路隨芳草。尋鐘歸舊山。猿聲深澗冷。雲影上方閒。後夜遙相憶。松門且莫關。

英上一首

上字卓今。新會人。諸生。

谿上作

清谿一來往。石上自潺湲。鷺立芰荷際。蟬鳴槐柳間。微風當近水。殘雨不歸山。停棹待漁父。相隨沾酒還。

梁可瀾一首

可瀾字元叔。廣州順德人。有狂仙遺草。

蓮餐閣集。元叔博學能詩。性酷山水。隱居羅浮。慕葛稚川修煉故事。自號三十二峯太狂長嘯仙。

夜泊西灣

野水泠泠浸碧天。西灣深處泊漁船。千山月色孤篷外。半夜潮聲一枕邊。春夢覺來傷往事。鄉心老去憶行年。白頭不是忘歸客。獨對蘆花思悄然。

庚樓一首

樓字本叔。歸善人。

次答張伯洪

白髮催遲暮。高峯伴寂寥。十年成底事。一別又今朝。但可花經眼。何當米折腰。子山詞賦好。遺恨向誰銷。

趙煇夫二首

煇夫字裕子。番禺布衣。有草亭稿。

過梅花村

乍識羅浮路。梅花尙有村。二三家映雪。清淺水臨門。古夢銷香寂。寒梢挂樹痕。仙家歌舞罷。山色幾黃昏。

倚杖

莫上溪橋望。斜陽背晚鴉。衰年仍作客。亂世已無家。斷雁煙迷影。寒梅雪作花。片心搖欲折。淒切聽鳴笳。

梁觀一首

觀字顥若。南海人。

廣東詩粹。顥若詩有晚唐佳致。

經亂泛舟甘溪作呈同侶

久無閒興到溪村。舊友同遊不半存。山色幾曾離釣艇。潮聲空自過僧門。路經兵後橋梁斷。林有人來鳥雀喧。身外問誰歸計得。樵漁相笑未開言。

淩象八首

象字水木一字木道南通州人諸生有冰雪攜竹灰愁課等集

一經堂詩話水木遭世險巇沒身坎壤困窘訴辱胸臆鬱鬱不得吐盡發之於詩其自序云奔林之援聲愈蹙經霜之葉響愈懷又云性多感慨不能自同木石支離荒忽莫識所之喜不期笑而笑怒不期詈而詈幽緒無端弗可強已讀其全集大旨專主性靈有竟陵之清機而不墮其窳瘴

田按水木詩幽咽似寒蛩令人留聽

諸弟姪見過

見人遙擬是今果到江干帶露一身溼放筇詢我寒燃松持茗坐分石與雲看燭影分求宿江鷗暫避灘

狼山晚步

亦是春遊客日西山自幽巖花逐水落谷鳥喚人留江靜欲生月松深不待秋同心閒躡步汗漫更何求

夜過山寺

秋色冷一天此中人已眠白雲獨來去黃葉寺門前凭闌得山半依櫺見月全冥探思悄悄鈴鐸數聲圓

再過楊氏隱居

亦一居止見遐心曲徑經過尙費尋門欲向山兼得水屋因在野遂成林桔槔方舉雨來疾機杼微聞雲隔深好結數椽君左右記予此志已從今

獨吟

坐久黃葉落。開閉竹扉聲。忽問何人至。石邊鶴影橫。

投宿北山蘭若

帶霜披積莽。逐月繞梧桐。不厭幽人住。山空一徑通。

贈融上人

手關荒山身欲老。還將禪定對空江。松榛寂聽皆成悟。一任雲來自打窗。

送張子歸陽羨

花落愁兼海燕飛。家山此日筍初肥。獨憐不及舟前柳。一路青青相伴歸。

楊時暹二首

時暹字赤文。南通州人。諸生。

重題雪竇

小閣出岑蔚。何因清話同。半窗月影上。一枕水聲中。涉趣無拘礙。觀心得妙空。顛師扶我醉。深媿酒顏紅。

贈仁風上人

古廟香爐好作家。客來拈果復拈茶。芒鞋信踏村中草。竹杖閒挑陌上花。一滴曹溪分雪乳。六時香雨步

金沙相逢不識僧。伽旬。魔手楊枝拂面斜。

凌潞庚四首

潞庚字季元。南通州人。諸生。有鄭圃草。

出英社詩品。鄭圃草如市中賈客。無物不有。不必皆希世之珍。

小除夕雨得書字

相驚寒較甚。茲夕亦云除。雨雪天涯暮。兵戈歲月虛。村醅期共醉。短髮不禁梳。入夜檐聲急。移床約舊書。

范汝申邸中夜飲

歸期擬卜轉迢迢。賸得閒情付濁醪。竹葉於人差有意。燈花向客太無聊。江鄉歲晚愁無雁。旅邸風高感敵貂。近得南枝春信至。相將長耳策溪橋。

登雨花臺望鍾阜諸山志感

霜林簇簇護丹梯。日照江門萬樹低。六代風流杯底盡。五雲宮闕望中迷。山應似我經秋老。鳥亦多情著意啼。金粉銷歸何處是。瀟瀟木葉下前溪。

宿蒲上口占

亂竹蕭蕭壓短垣。寒侵破壁一燈昏。莫愁風雪明朝惡。聞說梅花發遠村。

陳宏裔七首

宏裔字文起南通州人諸生有蒼雨詩集四卷

一經堂詩話蒼雨集我用我法深悟剽賊比擬之繆卓卓可傳

田按文起詩殊爽健

宿雙溝道問題壁

暝色催涼雨。投身荒圃間。迹疏孤客窘。人定百蟲閒。遠望若可卽。舊山殊未還。明朝須早起。聒耳怪潺湲。

留客

涼風生戶牖。急雨下庭柯。我正欲飲酒。公今無渡河。及時山果熟。隨意野蔬多。莫畏前溪暝。煙中有綠蓑。

亂定出山晚歸有作

爲戀嵩陽寺。遲遲到郭門。北山新有檄。南國舊招魂。孤鳥投殘照。歸雲擁暮村。漁樵皆絕迹。兵甲畏黃昏。

落日

關河百戰後。落日迴含愁。古戍人煙斷。空山草木秋。生涯傷米價。國稅及漁舟。野哭何時息。諸軍正逗遛。

憶昔

輪臺下詔悔從前。哀痛中原戰鬪年。博士尙陳鹽鐵論。上方時減水衡錢。新亭一夕悲禾黍。故國三春泣

杜鵑回首興亡成俯仰。廣陵城北斷炊煙。

送笠澤之大梁應聘

一樽祖道唱驪歌。驢耳批風指汴河。海嶠白雲親舍遠。天涯紫氣舊京多。逢人是處心堪寫。揖客從來禮不苛。若過夷門應悵望。大梁公子近如何。

過吳小髻新居

槐影初斜聽午雞。呼兒翦韭婦蒸藜。故人治具留花下。高士移家近竹西。肯使姓名通狗監。可聞比舍有牛醫。藥欄莫怪頻相過。坐惜春光入鼓鞮。

季良眉一首

良眉字子常。泰興布衣。有北村詩鈔。

感興

萬物悲秋氣。漪塘日半斜。孤清憐浴鷺。疏放對溪花。鬼火青依草。漁舟白近沙。閒愁輕易起。觸目已成嗟。

楊麓一首

麓字戶雲。南通州人。諸生。有竹柳堂。西林社。自怡等集。

一經堂詩話。戶雲與里中范十山。孫皆山。胡麟兮。結社山茨。其詩鉤棘索隱。沾染鍾譚習氣。其流利清越者。如水亭云。客意方

獨成流鶯乃相顧閉居云有情夜月邀詩友無那春風戀酒人集中佳句也

薄暮歸舟抵塔山乘興登眺

嵐氣暮未落。攜筇上遠岑。潮來山欲去。天盡水多深。對月發吟興。因風揚梵音。征塗吾倦役。久動故鄉心。

孫模二首

模字楷人。南通州人。諸生。有悲煙草。

于一水亭

年來歧路歎紛紛。偶問風塵一識君。沙漠誰人悲雁字。邗江有客乞鵝羣。相逢旅鬢皆秋色。對酒鄉心隔楚雲。我亦攜琴訪同調。一泓流水靜中分。

酒醒夜起

重剔銀缸暗。起看北斗斜。忽驚清影併。殘月在梅花。





# 明詩紀事卷三十

## 辛籤

李標一首

標字子建嘉善人自號東山遺民有東山遺稿。

靜志居詩話子建精於戎機戰略王邁諸書史閣部道鄰辟爲記室事不可爲返里與魏吉士子一深契吉士公車北上執手河干謂子建曰子夢斜塘見茫茫一片土無復雞犬桑麻行後得無有變乎子建戲曰君且富貴宜目中無人耳甲申吉士喪車北還經斜塘子建撫棺曰子一子一果妖夢是踐耶慟哭失聲繼聞史公殉節揚州渡江會葬其衣冠於梅花嶺歸而繞屋皆種梅賦詩三十首蓋託於西臺慟哭之謝參軍云。

病起園梅已殘有感

病裏看梅也療饑春光依舊帶圍非有情花片無情雨攪起春愁歷亂飛。

葉珍一首

珍字重君嘉善人諸生有潛夫集。

魏塘詩陳重君應大司馬張公國維辟爲記室倚馬草檄讀者汗浹髮豎已杖策入園嶠歷東粵聞父喪跣足遺歸旣葬復憫憫出門瞻河登岱感物愴懷一寄之詩歸里棄故廬別構茅屋數椽壘土成阜曰果山黃冠布衲矻矻著書以終。

體上人開講鐵佛寺賦贈

攜杖湖山側。相看白髮新。烽煙存古寺。冰雪見完人。交遠情偏密。機空語自真。虎溪何必遠。撫掌悟前因。

孫纘祖二首

纘祖字昭令嘉善人諸生有隆略堂詩二卷。

和顧偉南九日

令節當風雨。繁雲鬱未開。凌秋一雁過。落木萬山哀。短髮還扶帽。長歌數舉杯。東籬泛菊者。應望白衣來。

傷春

舊苑荒荒長綠蒲。衣冠無復想雄圖。孝陵紫氣春蕭索。少海前星事有無。帝子夢寒春草碧。野人愁絕海雲孤。可憐此日空翹首。猿鳥遙天淚欲枯。

蔣國榮一首

國榮字功夏嘉善人。

棹歸榮川

蟻帆江海寇。青溇阻去槎。坐悲寒食雨。吟望古魚沙。改徧新林火。凋殘舊塚花。淒淒櫻筍餉。誰過野人家。

蔣平階一首

平階初名雯階。字馭閔。一字大鴻。華亭人。僑寓嘉善。有集。

黃觀只述就獄始末爲誌悲感。

何事輻車客。棲遲感歲華。范滂甯就吏。張儉竟還家。二月秦淮柳。三秋句曲花。圓扉真不惡。慰爾莫長嗟。

計孺一首

孺字元孺。一字古民。常熟人。僑寓嘉善。

魏塘詩陳元孺工詩。清真洒洒。晚唐中之清弱者。

移居

北山曾竊吹。南郭且潛身。松菊本無主。雲泉任卜鄰。著書強自喜。乞食肯言貧。便是柴桑里。深居數夕晨。

黃輔一首

輔字弃公。如皋人。諸生。有怨菴詩稿四卷。

移竹

幽居愛結水雲傍。曲徑方塘卉木香。添得琅玕三十箇。一庭秋色似瀟湘。

叢一蘭一首

一蘭字栖枳。如皋布衣。

東逸上人索茶

庭槐風雨午泠泠。一枕羲皇夢自醒。莫道書生無箇事。焚香拂几著茶經。

范廷瓚一首

廷瓚字獻重。如皋人。諸生。有吳吟、竹西咏、漚莊集。

玉鉤斜

吳公臺下墳。玉貌化爲土。誰慰六朝魂。悲風作寒雨。

馬鑾二首

鑾字伯和。貴陽人。

田按。伯和馬士英子。華亭顧在觀爲楊龍友所引。入士英幕。嘗言阮大鍼不可用。大鍼欲起鉤黨之獄。在觀說伯和泣諫。賴以稍止。是亦能幹蠱者也。國亡後。垂簾金陵。賣卜以死。士英又有子名錫。爲禁軍提督。大兵渡江。梟其首於市。見廣陽雜記。

追和亡友鮑曼殊見贈

贈言能幾日。君已倦人間。到死事方畢。有生誰得閒。夜臺仍貰酒。遺草欲藏山。幽感元無隔。招魂自可刪。

聞蛩

秋夜已淒清。空階爾復鳴。故催砧響亂。如與客愁爭。酒淺夢難續。家貧心易驚。燈前兒女笑。同聽各爲情。

吳道約一首

道約字博之。一字亞侯。桐城人。諸生。有大安山房集。

秦淮雜詠

油壁車前納晚風。單衫杏子溼微紅。何當素手攀珠箔。秋水橫波一笑中。

楊焯二首

焯字俊三。吳人。僑寓金陵。

秣陵雜詠二首

城南臨眺處。傳爲雨花臺。野曠層陰合。山空積翠開。吳雲連海動。朔雁暗江來。坐覺煙霄外。風聲戰角哀。  
正學祠邊路。沈吟木末亭。雨飛垂薜荔。臺古落丹青。夜火歸遊騎。寒城沒曉星。蒼蒼空霧裏。應見哭青冥。

黃世康一首

世康字元榦。莆田布衣。

關陔詩話。元榦負不羈之才。壯遊四方。嘗出山海關周覽形勢。察沙塲堡塞屯牧戰守之宜。渡遼水入燕。將上書言邊事。時士大夫譁言兵。咸以爲狂。每所遇而歸。後客顧小侯所。建家爲草。顧襄恪平蠻露布。援筆立就。辭義瓌璋。所建大喜。酬以金百斤。縑十疋。元榦分贈貧交立盡。

重陽前一夕從家給諫茶讌同吳元翰韻

蕭颯寒氣肅。登高孰擬賦。蠟屐遲明朝。瓊筵啓茲暮。石泉響試茶。庭菊香墜露。昔聞林下風。今見塵外度。志以澹泊明。道以塞默悟。顧往淪芳途。撫茲愜幽趣。雲影流方塘。風聲寂高樹。

周蕤卿一首

蕤卿字爾修。莆田人。國子監生。有章林岩閨草。

春日雜興

翹首看黃鵠。高飛不可攀。幽心依白社。託興在青山。草閣溪聲細。松門鶴夢閒。微吟向林薄。妨損石苔斑。

林璟一首

璟字台正。莆田人。諸生。有簡園詩集。

闕陵詩話。台正同遊諸君。皆感楚咻。獨能不墮時趨。取材於漢魏六朝。亦磊落之士也。

門有車馬客

門有車馬客。車馬何軒軒。問是故鄉人。披衣不及殮。延客登我堂。稍稍敝寒溫。客心乃自悲。對我淚傾盆。云當出門時。辛苦猶宵奔。故族已凋喪。親戚無一存。巍巍舊第宅。蓬蒿翳其門。昔時歌舞地。今日聆清猿。君家有邱隴。狐兔遊其原。還憶平生親。跡往惟孤魂。聽此未及終。氣促聲已吞。勸客飲此酒。感慨涕盈樽。

方沂一首

沂字宏祐江甯人有天隨堂集且漁集

金陵詩徵宏祐自號江上野漁結茅江上得魚輒以易酒醉則高吟與僧克明巨顛剖石閣瞻與周等倡和皆隱於方外

魯兩生

繼聖如有作百年始勝殘漢初承秦敝禮壞樂不完卓哉魯兩生欲以責君難奈何叔孫通因陋成苟安遂令一代制王霸雜申韓堯禹治天下澄源在其端土階三尺餘豈直奉崇觀

王之梁一首

之梁字雲峽嘉興人僑寓金陵有讀史廬稿

金陵詩徵雲峽仗劍遠遊福王南渡慨然上書陳策爲馬阮所忌幾被害南都失守遂頽然自放生平好結客每遇豪士攜酒對大江痛飲嘉興周質憫其流離以詩招之歸云咫尺傳烽隔往還故園流水自潺湲寒煙豈限重湖雨春樹能深二月山結客徒然開竹徑避人應復閉柴關他鄉縱有憐君者何似歸來十畝間雲峽竟不歸伴狂以終

蘇臺頌

蘇臺高高不極臺高望見臺兵入當時吳漢爭江汜虎鬪龍爭勢未已偏師一旅控臺城更出一軍援唇齒批亢擣虛斷中堅左支右梧應莫抵天下事未可知何爲乎飲河之鷄怡堂之雀徒然守此彈丸之黑子堪憐跼蹐無良策但取蘇臺作京國旣無島中五百人空結堂下三千客雞坡狗塘競吳子狗盜雞鳴



無一士。祇有田橫倔強心。昂首漢皇呼我爾。檻車肯乞隆準憐。怨魂夜哭龍江水。噫吁嘻。蘇臺高高已夷。吳民猶問張王基。

覃獻錄一首

獻錄字公烈。荊州人。明末官中書。國亡後。走日本。暹羅。晚居鍾山。

東粵舟中與故人話舊

離亂移家西復東。故人相見已成翁。旅窗記別十年外。前夕論心三月中。按劍風塵驚老大。聚沙庭院與兒童。蹉跎莫話文章事。聲價於今總不同。

鄧右符一首

右符字台卿。南豐人。有龍城隱集。

遊崇覺寺有感曾文定公墓

駐馬寒塘聽晚鐘。平安竹下走青童。松杉異代秋風裏。最屬荒碑落照中。客爲白雲添悵望。禪從黃葉悟真空。斯文今日誰爲主。莽莽寒山感慨同。

黃文星一首

文星字子威。南昌人。僑寓孝感。貢生。有望楚堂集。

春湖曉釣

半湖春雨一蓑煙。盡日蕭蕭漾碧天。隔岸桃花茅屋底。斷無人處有漁船。

璩一麟二首

一麟、字逸仲、建昌新城人、諸生。

同涂山公夜渡江門

看山不覺晚。乘月到江門。野寺橋邊路。漁家竹裏村。長林通古渡。遠燒隔寒原。獨夜偕君去。幽懷未可言。

溪上

小徑入松林。寒流爭斷岸。漁歌送響來。時與溪聲亂。

盧傳來一首

傳來、字復郎、一字念聲、甯鄉人、崇禎貢生。

高歌

孤憤誰堪語。高歌自寫哀。世人幾欲殺。吾黨亦相猜。短髮秋霜點。寒衣薜荔裁。坐看三徑裏。晚菊傲霜開。

李振聲一首

振聲、字元公、東陽人、有石艇子詩。

金華詩錄。振聲自號石艇子。勝國遺民。自題墓石。守志以終。

草堂

築石面郊坳。清光滿戶庭。水方嚴瀨碧。山學灞陵青。我意懷肥遯。人情忌獨醒。夜窗松月白。坐獨楚騷經。

戴于庭一首

于庭。字子薦。金華人。貢生。官沙縣教諭。

閒居

解帶有餘閒。玩此一拳石。讀罷黃庭經。松蔭墮秋碧。

駱雲程二首

雲程。字天游。一名雨禾。字穉孫。嘉興人。有素券堂集。

魏塘詩陳。天游饒膽略。知兵事。中丞岳和聲出鎮榆林。延掌書記。時乘駿馬走塞上。與宿將賈酒悲歌。縱觀亭障。詢各邊形勢。凡阨塞要害。如指諸掌。年九十餘。談及馬阮。輒髮植齒擊。以不能奮臂其間爲恨。嘗與蔣之翹。選橋李詩乘。未及梓。

送弘與上人採茶埭山

飛錫躡芙蓉。穿蘿摘紫茸。香煩三等判。色借一谿濃。雲乳擊甌泛。雲芽裹箬封。師還結湯社。參破趙州宗。

暮春

愁中忘却春歸去。綠暗蘼蕪燕子飛。還憶月明攜手處。半庭花影上人衣。

張玉成一首

玉成字成倩。如皋人。諸生。

田按。成倩輯七言律準四十七卷。自敘云。樂有準。六律之節以達。詩有準。五十六言之法以昭。度有準。萬器之情以得。得準之義。可以言詩。成倩所著不多見。未知於準之義果何如也。

雪中懷冒伯麀王翰卿

萬木蕭條入暮煙。繽紛飛雪壓籬邊。爲慚仲蔚平陵宅。翻憶王猷剡水船。歲事淒涼愁共劇。風塵搖落病相憐。那堪更滯三閩地。讀罷招魂思惘然。

朱文心一首

文心字珮龍。南通州人。貢生。有惺園集。

金陵江口夜泊

孤舟江下泊。秋夢耿難成。片月中流影。千帆半夜聲。地鄰桃葉渡。山近石頭城。倚舵聞吳詠。偏令旅思生。

吳爲霖一首

爲霖字景傳。無錫人。有白賁集。

客自澄江歸有贈

浮遠堂前路。微風穩放舟。江昏茶磨雨。煙暝弩臺秋。入饌花雞脰。開樽綠蟻浮。西塘十八里。來往候潮頭。

# 明詩紀事卷三十一

辛籤

潘陸二首

陸、字江如。吳江人。僑居鎮江。有穆溪集。

明詩綜。魏楚白云。江如四壁蕭然。而北海之座常滿。其論詩慷慨。謂鍾譚興而國亡。是亦法家定案。

生米鎮

古鎮風帆落。天涯倦客回。白雲生鵝嶺。真氣挹蛟臺。瘴海軍書警。殘黎野哭哀。青青霜岸樹。記取豫章材。

劍津

城下三溪合。當時七較齊。曾聞朱鷺出。復見杜鵑啼。碧草年頻換。蒼梧路總迷。向來消息斷。淚盡浙江西。

湯燕生三首

燕生。字玄翼。一字巖夫。甯國太平人。有商歌集。

新治荆思舊錄。嚴夫自太平遷蕪湖。所居地甚僻。屋兩楹。內外皆農具。恬然一農人也。恆苦人過訪。人亦罕有造者。詩皆唐音。篆書古淡入妙。不在伯奇子行下。

赭山二首

赤鑄山頭鳥不飛。上皇曾此易青衣。無多侍從爭投甲。有限生靈但掩扉。五國城西邊月苦。景陽樓下暮鐘微。傷心莫唱淋鈴曲。未得生從蜀道歸。  
淚逐天風向北揮。山僧指點舊重圍。軹車東駐泉偏咽。代馬南來草不肥。野老久知今日事。先臣猶護昔年非。延秋門外王孫盡。司馬元戎自錦衣。

梅村詩話。玄翼諸山懷古二首。於乙酉五月事極切。哀婉淒涼。使人不忍卒讀。武塘夏雪子極稱之。

訪漸江大師朔園

松響山堂水自波。晚知清淨寄雲柯。橫流江海牽舟去。失路煙霞引杖過。獨歎蘭亭離玉匣。深悲書院記宣和。藥欄秋興閒今古。留客聽泉蔓草坡。

范路七首

路一名激。字貞甫。蘭谿人。流寓嘉興。私諡貞簡先生。有靈蘭館集。

明詩綜。周青士云。遵甫潛心性命之學。不關佛氏。偶然作云。青青江岸山。活活江流水。夫豈不高深。有象終必毀。又云。我嘗夜分坐。仰天見北斗。風吹百草頭。月出萬山口。牧雲和尙愛之。欲付以巾拂。不受。海鹽張處士璵。白方講學硤石山。遵甫謂其晰明德格物意。有未安。別爲講義示學者。人或以其未盡合乎朱子非之。遵甫不顧也。其詩不費鍛鍊而出。誦之妍雅和平。晚開靈蘭館。寶藥長水市。乍愚乍智。人莫測其所詣云。

靜志居詩話。遵甫含貞履信。博通古今。賣藥市門。行歌帶索。由其見深。故於憂淺。譏遠斯視。患浮。昔人謂太邱道廣。廣則不周。仲舉性峻。峻則少納。遵甫廣不混俗。峻不污物。發爲詩文。多見道之言。裴子野之稱劉居士也。所修孔氏之學。則儒者師之。所明釋氏之教。則淨行傳之。所著文集。則詞人錄之。斯言也。遵甫庶足當之矣。

許燦晦堂詩話。遵甫隱君。貧等黔婁。和同柳下。學侔茂叔。節類伯鸞。常歲除大雪。王布衣人使人伺之。方懸破席。蔽風。夫婦嘔糠守歲。遺以米五升。不受。族弟思攜妻子鬻身求活。留之同飯糠。不以爲嫌。遭亂流離海上。志不少挫。遂於理學。多從方外游。不爲所惑。嘗曰。釋氏之學。一了卽爲百了。吾儒之學。百了方爲一了。其詩旨意懇惻。精光炯然。

田按。遵甫。蘄節旣高。吐屬自遠。埃壒。

### 感懷

夜定燈燼落。孤生邁遙想。歷物鮮所愜。心形逝成兩。蕙草日以摧。榛莽日以長。風雲道何窮。羽翮悲失養。擾擾泥塗中。誰能事鞅掌。

### 久雨

我心正悽惻。淫雨在此時。累旬不見天。局踣無所之。沿苔上危墻。中庭竟成池。萍藻忽已生。青青向檐楹。鳴蛙從何來。公然在床帷。但得天氣晴。東郊望耘耔。

### 夜坐懷唐上玉繆天自林邱聯句

獨坐燦清粲。華光照纖悉。囂訏旣云斂。四壁起蕭瑟。孤情渺難控。良契隔遐室。慧吟殊未忘。曜靈迺奔軼。



芳軌信所希。佳辰逝何疾。良哉古人言。寸陰抵兼鎰。

自傷

上有紅桃花。下有碧流水。一朝風相吹。桃花忽相委。嗟我飄泊人。所傷亦如此。

晚步

氣侵林木晚。歸步自原田。舊業愁中盡。餘生亂後全。人煙孤壘斷。衰草夕陽連。何處悲笳動。依然似去年。

一邱山院得主人吳君佐夜邀從山塗暗行二十里

山院黃昏政寂寥。感君仗劍獨相邀。荒煙暗盡來時路。漁火明隨去後潮。林下時時逢石虎。樹頭隱隱出山魈。柴門冥漠知何處。約略曾過舊竹橋。

遙經郡城作

愁雲黑霧壓城頭。丁令重來隔幾秋。折戟尙沈沙底鐵。殘陽空照水邊樓。風吹牧馬千羣出。浪打寒塘百道流。未到新亭腸已絕。何須極目望神州。

湯濩二首

濩字聖弘。吳人。有香草堂遺稿。

清涼山

風景故依依。孤亭出翠微。雨中同客至。月上望僧歸。山合衆樵響。風高一雁飛。胭脂井尚在。冷碧蝕苔衣。

懷顧甯人

虎頭應復讓君痴。儒俠僧樵事事宜。千百國風存野記。十三陵樹補新詩。音聲小悟殊堪喜。姓字頻更莫浪疑。懷友句成反自愧。半函煙雨隔秋思。

陳確一首

確初名道永。字乾初。海甯人。

訪蔡來老

東海尋高隱。翛然屢空餘。衰年千里客。茅屋一床書。傲骨支天地。清風動里閭。日斜攜手出。恰是晚潮初。

吳時德三首

時德字明之。一字不官。吳人有蘆中草。

湖山靈秀集。不官苦心學詩。清汜孤起。不隨時人徵逐。

田按。不官曾與錢宗伯倡和。錄其詩入吾炙集。

暮春述懷呈顧與治

江城孤客若爲鄰。相對黃花卽故人。仗酒撥愁餅易罄。開編臨牖月常親。好閒未遂翻爲病。得句能工始

愛貧漂泊異鄉還自幸。十年猶剩亂離身。

過張文寺隱居

苔逕逶巡破翠痕。蕭然南郭似荒村。滿畦野菜初生葉。近水垂楊半露根。著述可消閒歲月。春光偏到小柴門。幽棲自是吾儕事。秦後桃花且莫論。

答林茂之問予山中近況

日日蕭閒閉草廬。莫將蹤迹問樵漁。山中自是無他供。一樹梅花一卷書。

張光啓一首

光啓字元明。章邱諸生。

居易錄。元明世居白雲湖上。少爲諸生有名。爲梅長公。朱未孩二公所知。崇禎庚辰年四十。棄諸生。闢圃種樹藝花自樂。亂後足不履城市。年八十餘卒。有張仲子詩。往往可傳。

對菊

種菊叢叢傍石根。凌晨坐臥近黃昏。沾來新釀經秋醉。開盡寒花未出門。

張致中一首

致中。字性符。淮安山陽人。以經明行修舉。未授官卒。其友私諡恭孝先生。有眉尹文集。

靜志居詩話。復社初。君與白受藻素先。方能權選若率同郡諸子應之。而君爲之領袖。以尊經博古是尙。家雖貧。儲藏鼎彝。碑板之文頗富。有子弼。字力臣。棄諸生不試。工六書。

### 感懷

虎猛亦可搏。龍神亦可馴。咄哉不可下。無如壯士心。揚之秋雲高。抑之秋淵沈。哀樂詎有定。感物成斷斷。世路塞冠蓋。得意驕黃金。未逢尼父嘆。安知爲麒麟。

### 陸啓滋一首

啓滋字叔度。平湖人。貢生。有賁趾山房集。

橋李詩繫。叔度博極經史。不事章句。側儻負奇。通輕俠。類河朔壯士。好談論古今成敗。知邊塞事。扣之繼繼不可窮。嘗遊建業。命酒泛舟。召舊院名姬。大會詞人於秦淮。酒半。一姬倚檻微嘆曰。惜無兩岸紅蕖。佐此勝集。明日復讎。比客至。則晚風拂席。荷香襲人。舉座莫測其故。蓋於是夕懸金購數百盆荷。碎而沈之。自是十四樓中皆目爲樊川。復出。後走京師。垂二十年不遇。歸而貧甚。值喪亂。更名遜。字山翁。與酒人奇士邂逅。短歌軟歎。聲淚俱下。及沒。趙退之以文祭之曰。總君一身。頓殊今昔。翩翩五陵。瀟瀟四壁。金散名成。人完代革。

### 次酬黃平立喜余遠歸

易水悲歌萬里風。五湖煙雨一舟中。長安大道驅流馬。古戍寒秋斷晚鴻。醉酒漫勞王處仲。抱琴不學李元忠。移文正恐君先我。十載徒然草送窮。

張杉二首

杉字南士。蕭山人有集。

毛奇齡西河集。康熙二年。海上大獄起。歸安魏耕走蕭山。復走梅市。大將軍刊章遮捕之。獲耕。兼逮蕭山。梅市之藏耕者。以銀鑰鑰李達。楊遷。并祁忠敏公次子班孫。家人莫敢問。道路離立。南士挺身走三家。爲經紀其事。及耕伏法。班孫與達與遷並徙塞外。點解多一人。則南士也。解官斥之曰。汝欲偕往耶。南士曰。當魏耕逃時。亦思至某家。徒以舟楫未便。故幸免。今不忍三人者。獨行。欲送之過河。而執事以爲欲偕往。吾豈畏往者耶。解官義之。勸之返。乃嚔眊牽衣而別。

譚志居詩話。南士周見洽聞。賦才獨步。詩篇和雅。無傲志之音。

九日

江楓吹葉滿江皋。湛湛江流雁正號。病起孤懷愁望遠。節逢九日罷登高。茱萸香憶仙人佩。白苧寒生處士袍。手攬黃花還強酒。壯心倚醉轉蕭騷。

蒲坂道中作

峻坂長驅匹馬過。春風吹客奈愁何。重華不返蒼梧駕。孤竹空傳採薇歌。北望雲中連紫塞。西來天上瀉黃河。幽懷故國歸何處。此日征衣淚更多。

史玄六首

玄字弱翁。吳江人。有弱翁詩文集。

徐巖百城煙水。北林在吳江縣北門外。俗名新溪。崇禎間。史玄隱居之地。玄所著有詩集。文集。河行注。甌東倡和集。鹽法志。吳江耆舊傳。梅西雜誌。舊京遺事。

### 中秋攜新姬今宵出都

俄然出樊籠。再遊江海天。瀼瀼白露秋。我行已三年。京華貴束溼。龍沙事烽煙。黃金養末士。此輩無高賢。怪汝蘭蕙姿。識我思歸田。相從願同行。梳頭鞍馬前。我家住江南。采菱復采蓮。自從遠行役。湖渚空潺湲。今日果何如。與汝相周旋。大婦織流黃。小婦隨機邊。三日下兩絹。匹匹絲纏綿。其中我讀書。文史聲相宣。陰陽事殊用。教化達以專。念此洽幽趣。豈計囊空錢。汝車我馬行。明珠雙炤懸。

本事詩崇禎時。弱翁在都門娶燕姬。明慧善曲。字曰今宵。德州盧侍御世灌賦傾城悅名士。詩贈之。一時和者甚衆。乙酉後。弱翁沒于西濠。姬亦嫁爲廝養婦矣。

### 秋霽題北林敝廬

郊墅秋陰後。平橋路未通。寒林經晚翠。早稻出香紅。歲祲依殘帙。年侵愧轉蓬。雙峰門外對。野興似村翁。

### 春感

秀色江城舊。今來瓦礫平。春風吹綠浦。芳草不能生。甲第青蘿透。空林黃鳥鳴。若逢明月夜。橫笛作邊聲。

### 庚辰冬同松之文將掌文虎邱訪道開扇公

步屨尋開士。探幽及小春。琴鳴流水靜。花放衲衣新。黃葉千年樹。青山半醉人。還家無底事。蘭棹且逡巡。

祇園寺

絕壑長林古寺開。石門殘日滿蒼苔。嵐光雲影千尋落。帆色湖陰萬里來。池上白蓮堪結社。院邊叢竹且銜杯。不緣病減登山力。待月遙從縹緲回。

當塗縣

晚泊當塗縣。青山在縣門。仙人今亡去。愁殺謝家村。

趙渙一首

渙字少文。吳江人。

田按。少文與吳日生。史弱翁倡和。號東湖三子。

楊龍友

夫子天南秀。文星動夜郎。攜詞飛赤電。拂劍倚青霜。鸞翮離荆棘。龍韜傳玉璜。羣公正推轂。佇望搢殘疆。

顧有孝一首

有孝字茂倫。吳江人。諸生。有雪灘釣叟集。

徐鈞南州草堂集。茂倫爲詩。每矜慎不苟作。遇有分題擊鉢者。恆終日不成一字。而間出片言。必雋永傾其座人。吾邑自啟禎以後。如周安期。徐介白。俞無殊。張九臨。朱長孺。暨茂倫。皆所謂前朝之遺老。盛世之逸民也。

靜志居詩話。處士甄綜百家之詩。開雕分授。盛行於時。賓至輒留。江左有齋菜孟嘗君之目。由其胸無柴棘。故月旦同辭。晚自

稱雪灘釣叟松陵女子沈關關刺繡作雪灘濯足圖一經裝池過江人士以不與題辭爲恨

寄贈沈留侯借小阮北上

春風楊柳拂行舟。有美聯翩共遠游。入洛陸機新作賦。依劉王粲故多愁。舊京朱履三千士。荒塚冬青一十秋。湖上好山無恙在。獨持卮酒對羣鷗。

周安一首

安字安節吳江人有草閣集

顧有孝雪灘釣叟集安節沮懷幽詣躡武宗雷清音環珮不減魚山仙梵

月夜懷此山禪師兼寄張文通

憶昨投蓮社。相攜出虎溪。雲山忽間阻。月落雪川西。露下花逾白。松高鶴共棲。還驚臨照內。江海有征聲。

雷士俊四首

士俊字伯顛涇陽人諸生僑居江都有艾陵詩鈔

揚州府志士俊棄諸生專力經史百家熟悉古今治亂得失之政辨別君子小人消長進退之幾爲文鉢心剴胃既脫稿必琢磨再四始出以示人貧老負氣悲憤得疾以卒

田按伯顛詩古直老蒼有唐人格調時攀魏晉此秦風之壯激者

送河間司理李杞瞻赴任



去歲纔識面。君尋作南遊。至此無幾日。一官之瀛州。憶昔論文飲。客舍成獻酬。門外車馬喧。君行不可留。築夫吾老友。嘯傲臥山邱。今又隨君往。索居誰與儔。蕭條北風厲。冰雪滿道周。握手難爲別。濁醪盡更籌。河間近京畿。動輒羅愆尤。虎狼恣窺噬。彷徨使人愁。何以垂令名。勞民庶小休。誦彼小宛詩。懷古悵悠悠。

送王幼華歸秦

故人西歸去。五月天方熱。中途多險艱。單車向疇曠。火雲照烈日。遊子正飢渴。庭樹綠陰濃。執手難爲別。近詩推秦風。高古比駟鐵。我友有新篇。字字皆白雪。

春日詠懷二首

青青道旁柳。潺潺澗中水。柳枯春復榮。水逝來如駛。人生百年間。一死無活理。佇立臨岐路。悠然念君子。焉能乘雲翔。阻絕動盈咫。登高望邱墓。前後長荆杞。聖愚固皆然。鮮民悲天圯。孤鳥蹲寒樹。向夕鳴不已。步登蜀岡上。遙望廣陵城。獨立衣縹緲。颯洒起風聲。大道何盤盤。匹馬自孤征。荒徑埋瓦礫。山寺空崢嶸。日光乍有無。白雲樹杪生。回首睇吾廬。兩眼淚縱橫。

李沂四首

沂字子化。一字艾山。號壺菴。揚州興化人。諸生。有鸞嘯堂集。

靜志居詩話。啟禎間。詩家多惑於竟陵流派。中州張孤客暨弟鳧客避寇僑居昭陽。每於賓坐論詩。有左祖竟陵者。至張目批。

其頰。是時艾山特欣然相接。故昭陽詩派。不墮姦聲。皆艾山導之也。  
田按。子化詩。清真絕俗。晚好學仙。蓋有託而逃也。

### 玉壺吟

予夜夢一男子持扇見示。題曰玉壺澄澈。冷貯本色。覺而爲此吟也。

堯之聖兮舜爲弼。皇紀張兮定八極。八極定兮二曜光。端予軌兮由周行。由周行兮靈之綬。遵無爲兮樂安居。道之喪兮繩墨旣多。紛總總兮王化訛。流之濁兮源弗清。法令章兮亂日生。亂日生兮巨盜起。攘神器兮劫天子。海水淘兮山之椒。天鬪其日兮民爲妖。民爲妖兮心爲鬼。絕陽光兮毒生理。淬予劍兮張予弓。貫魍魎兮磔三彭。三彭磔兮六合清。驂兩龍兮遊赤城。幹元化兮紐虛無。返予初兮歸玉壺。

### 刈薪歌

今年水大薪難取。蘆花水面蘆水底。尺五鎌刀丈二柄。竟日一人十束止。辛勤餬口豈能長。尙憂妻子飢凍死。黑雲滿天烏亂飛。屋西望船船未歸。

### 聽楊懷玉彈琴歌

楊君善彈思皇操。自言崇禎末年作。強之再三始肯鼓。拂絃沈吟淚先落。引商振角時扣宮。八荒蕭械回悲風。天地愁慘白日凍。啾啾鬼哭空庭中。絃鳴指咽絕復生。黍離麥秀傷人情。感時述事語不明。四座慄

慨誰能平。楊君本是西蜀豪。幼精馬槊兼弓刀。三巴健兒好顏色。立功好著團花袍。是年天子郊穹蒼。還宮三嘆古樂亡。爰命廷臣定樂章。侍臣聞詔俱徬徨。或薦楊君通律呂。徑來天上調宮商。便殿侍坐近玉牀。賜食得比中書堂。蠶翻蛟躍乾坤改。垂老飄飄適東海。千金囊橐散無餘。惟有先皇賜琴在。陽山客舍長莓苔。重門小苑碧桃開。靜簡道書春寂歷。細爇柏子雲徘徊。滄浪之水何清清。波底墜雪白鷺明。布帽青鞵又西去。日暮相思空復情。

田按楊懷玉事詳見李確詩後。

避亂舟中作

避地家何處。飄然更出門。艱難攜十口。風雨向孤村。遠浦殘荷立。寒沙急浪吞。偷生任飄泊。時事不堪論。

王廷璧一首

廷璧字雙白武進人。

聞雁

雁聲何處至。明月照西樓。寂寞青楓樹。蒼茫白露洲。雲中呼侶去。天外入邊愁。我亦窮途客。悽然驚暮秋。

談允謙四首

允謙字長益丹徒人有樹護草堂集。

靜志居詩話。崇禎初。大官庖開。應支物價簿。帝詰內侍。謂太浮。且曰。炙鷄醃鱗肉。酢在某肆市之。錢半百耳。內侍驚愕。錄長益聞內臣述往事。詩云。漕邸曾親到市區。民間物價每留連。西華鷄炙前門鮓。一箸纔消半百錢。足以徵思陵留心民事之一端也。

### 臨江柑園

臨晚蕭灘上。柑園向水開。黃從入霜後。香自過江來。日望湘雲至。今疑硤雨回。徘徊不能去。誰識楚臣哀。

### 東湖

南浦積雲何日起。西山積雨未能晴。春波近已浸城半。秋水年來與路平。下楊有誰留孺子。樹蔬無地訪雲卿。歌樓燒盡多新鬼。夜靜猶聞絃管聲。

### 滕王閣故址

高閣臨流付劫灰。重游難問舊歌臺。鋤蘭日見佳人去。芳草何年帝子回。南浦鷺鷗隨浪沒。西山風雨過城來。多情今夜章江水。吹盡殘雲月又開。

### 邊關春晚曲

胡姬隊隊弄胡琴。酒滴醴酥取次斟。花柳既無鶯燕少。總然春去不關心。

### 蔣人一首

人字公凡一字昭遺嘉興人

梅里詩輯布衣泉石盟心潛蹤村僻自署桃花里人

歲除前五日送金子還白下

衰柳不堪折寒梅聊贈行春風知幾日還到石頭城

王巖二首

巖字築夫寶應人有異香集白田布衣集

靜志居詩話築夫肆力爲古文辭要以醜樸勝若惟恐其文之工者頗有類於穆伯長柳仲塗尹師魯石守道諸家賦詩不多原本杜曲

孫無言之虎墩贈別

又欲歸何處飄零問海涯山前多虎迹世外有人家曠野悲風動孤舟落日斜誰能臨積水容易臥煙霞

尋春

尋春在何處惆悵落花前淮海仍寒食江山老杜鵑全生惟縱飲養拙只高眠日落飛飛燕歸巢意可憐

孫爽一首

爽字子度崇德人有甲申以前詩容菴集

秋懷

疏寮映山帶。竹瀼怒泉落。鬱氣集松杉。漸知林影薄。殘英泥輕寒。側側護羅幕。結志獨徬徨。發憤以著作。愴悼雅云厚。冥觀還自樂。

蔡仲光三首

仲光字大敬。蕭山人。

采蓴

鱸魚膾水鄉。雒客動歸腸。一夜秋風起。滿湖蓴菜香。布帆飛鳧鳥。花嶼鬱蒼蒼。小摘隨人意。幽棲好不忘。

飛星

薄暮愁相向。西風人迹稀。天星大如椀。冉冉渡江飛。海水秋聽壯。吳山夕望微。十年戎馬地。回首一霑衣。

題姜廷榦畫

巖高秋氣深。臨岸幾茅屋。此徑鮮人行。何由知路曲。

錢肅潤四首

肅潤字季沐。一字礎日。無錫人。諸生有文灝。十峯等集。

感舊集。震滄云。礎日明諸生。甲申後棄去。縣令以事夾其足脛。至折。礎日笑云。藝一足。庸何傷。遂爲跛足生。自號東林遺老。

采蓮曲

采蓮女。雙槳逢江滸。吳姬越豔誇眉嫵。兩地新妝一色裁。玉釵羅袖嫻嫻來。荷花欲語卻不語。誰人解語爭徘徊。爭徘徊。弄舟搖碧水。水中驚起雙鴛鴦。作浪迴風飛不止。

過平原懷平原君

人生莫結客。結客須及千與百。千人百人縱美好。亦有瘖聾與跛躄。自來傾士推田文。滿堂食客何紛紛。同時肝膽更誰向。共說應向平原君。此行正在平原里。卻憐未見佳公子。衣冠零落野草中。土田委棄荒煙裏。齊之封疆趙食邑。昔年結客如雲集。當今覽者是何人。公子在焉呼或出。

客從婁東來述陳言夏近況賦詩嘆之

販樵鬻苧出江邊。十里桃花五里煙。唐市湖林常一過。兒童爭道孝廉船。

過汨羅追和韓昌黎

湖水遙通江水波。南流爲汨北爲羅。舟行不識懷沙處。相向何方唱九歌。

丁之賢三首

之賢字德舉。漳浦人。

何梅綬安二布衣詩。明崇禎中。流寇起西北。德舉挾策入都門。客南司空邸第。欲獻書闕下言兵事。會司空罷官歸秦中。挾德

舉與俱書不果上德舉請司空厚爲資裝費十日糧短衣疋馬循賀蘭山出長城訪求古戰陣營壘日與朔方豪傑畫沙聚米爲擣賊策計謀甫合而李自成陷西安破潼關明社遂亡德舉念家有老母脫身南下有王將軍者建牙汀州聞德舉名招致幕下贈以一婢小字海蠻未幾王將軍別調去德舉偕海蠻歸窮老無所聊賴僦屋城東桃花溪上客至樵蘇不爨清談而已予猶及見其白髮鬢鬢垂額上楮冠布袍整靈市廛中沒之日邑令秋浦檀光熾爲之書其碑曰詩人丁布衣之墓德舉在秦時所刻詩止百餘首里居家貧不能具紙筆所爲詩多草書歷日背上字漫漶不可識認予以意釋之統爲鈔撮合朱布衣詩刻之爲綏安兩布衣集

榕城詩話之賢詩五言若林豁秋摧葉江喧夜聚航平沙含月迴遠火雜星明河流當晉曲山勢出秦平七言若潼關東抱成金陡灞水西來作御溝皆清峭刻露

### 淮安署中和別李以理司理

戀戀惜明發其如游子何天涯纔挂席海內尙橫戈江轉鄉思近春歸別恨多懸知孤館夢帶月繞淮河  
夏夜澣墅關送張鍾石歸燕沈季聯歸越

越國南連海幽州北到天挂帆梅雨過驅馬火雲懸戀別還謀夜相逢未卜年卻教羈雁羨俱向故鄉旋  
留郎曲

向曉候天色江雲罩日紅囑郎休解纜亭午石尤風

### 朱國漢七首

國漢字爲章漳浦人



榕城詩話。朱爲章晚號獨醒居士。少孤。事母以孝聞。崇禎甲申變聞。狂走登越王臺址。北向號慟。累日夜不休。悉焚棄其素業。託於賈人以自晦。歷吳越。涉荆豫。往來燕趙。齊魯。鄆。與僮僕傭僧共甘苦。所至遇古忠臣名賢祠廟墟墓。掬石泉。摘山花。俯伏拜奠。歌詩憑弔。有騷人之遺意。五言若烽火夷陵道。冰霜息壤城。綠蒲畚客飯。紅葉女郎樵。鋤芝沿鹿去。拾橡伴狙歸。七言如無情漳水清何極。垂死奸雄意可憐。烟霞滅沒三山外。江海蒼茫一氣中。皆極鍛鍊。

田按。綏安二布衣。爲章爲勝。

感懷雜詩

生嫌雞蟲爭。死信鳶蟻食。鳶蟻何親疏。雞蟲互失得。乾餓成愆尤。擾鋤有德色。鼎鼎百年內。偈次復偈次。買山山不深。擇林林可卽。側身望冥冥。羨彼飛鴻翼。

旅宿杭川

唧唧復唧唧。床頭蟋蟀吟。關山孤枕夢。溝壑百年心。不雨暮寒薄。微霜秋氣深。更聞明月下。力盡擣衣砧。

丙辰楚中旅懷

故國飛鴻絕。關河仗劍行。秋風吹塞馬。殺氣凜嚴城。嶺徼猶擐甲。衡湘未洗兵。紛紛傳卜式。已拜漢公卿。

獅子菴茶話

疏鐘散林樾。秋意滿禪關。龍象諸天幻。茶瓜半日閒。生天須是慧。作佛不妨頑。坐久涼颿起。歸禽自往還。

吳城登望湖亭

金鏡回首夕陽邊。客裏年光感逝川。千里書來湖口縣。片帆人上秣陵船。長風捲浪花如雪。極浦連天草似煙。何處笙歌江水沸。令公祠下響神絃。

皖城

新開幕府控巖關。南北舟車判此間。落日淒涼余闕墓。浮雲斷續皖公山。蕭蕭木葉吹難定。渺渺秋鴻去不還。江上幾年銷戰伐。石苔堤草自斑斑。

武林懷古

趙家宮殿莽寒煙。鎮海樓空夕照邊。石鏡雲橫州十四。水犀潮落弩三千。疏鐘細雨湖頭寺。短檣輕橈閘口船。欲向孤山尋處士。梅花香雪落紛然。

徐晟二首

晟字禎起。一字損之。長洲人。諸生。有陶菴詩冊。

靜志居詩話。禎起交情真摯。悃愾無華。雖以陶菴自稱。不盡規撫栗里。

除夜寄家舅客鴛水

草草摧殘臘。沈沈接早春。屠蘇今夕酒。客夢各鄉人。望斷吳江樹。身疑谷口津。隔年風物好。別見柳條新。

送友之越

月照吳江冷。春從越地開。孤雲一雁下。匹馬萬峯來。意氣銷兵革。英雄半草萊。異鄉朋舊好。不放故人盃。

陳三島二首

三島字鶴客。長洲人有雪圃遺稿。

靜志居詩話。鶴客志士。所居蓬戶席門。而求友若不及。中懷孤憤。恆露于眉宇之間。其詩華整之中。間以清商變徵之調。惜乎早逝。未盡其才。

送友人之楚

此去巴陵路。秋風傳鼓鼙。長江舟上下。落日鳥東西。野狖窺人面。山雲信馬蹏。祖生長自往。旅夜聽鳴雞。

贈朱錫鬯

探藥吳門市。逢君已暮秋。涼風吹錦纜。明月照芳洲。叢桂王孫樹。幽蘭帝子邱。小山如可賦。紉佩共淹留。

盛斯唐二首

斯唐字集陶。桐城人。僑寓金陵。

金陵詩徵集。陶居金陵十廟西門。毀垣敗屋。蓬蒿滿徑。與林古度唱和。晚以目眚。屏居不下一人。

落葉

空齋樹晚儘。風乾搖曳聲。頻不忍看。斷柳枯桐無意緒。清笳夜月總荒殘。吳江信是裁詩冷。南浦其如送

別難。一自青楓凋玉露。巫山巫峽至今寒。

懷林茂之

幾度思君輒賦詩。羽飄鱗蟄每差池。舊栽柳色曾無恙。新買帆風未有期。千里夢回秋雨細。一燈愁擁夜涼遲。病中添病人無那。老眼聞知應淚垂。

譚雅一首

雅、字岑止。茶陵州人。

沅湘耆舊集。岑止早歲常從墨稼軒先生軍。亦殷頑也。劉杜三閩譚岑止又移寓石盤山。卻寄詩。有舉家真耐白雲寒之句。可想其風味也。

海上立秋

厓山往事易驚秋。忍對西風賦壯遊。擁衆田橫猶伏島。依人王粲且登樓。飄零家國生何益。莽浪乾坤死便休。盡說窮愁詩易好。慙無好句答窮愁。

方祖兆一首

祖兆、字昌祚。莆田人。諸生。

蘭陔詩話。昌祚工書法。亞於宋比玉。

宮詞

紈扇已經秋。紅顏欲銷歇。夜深下玉階。獨拜梧桐月。

王萬禩一首

萬禩字日華。一字龔甫。上元人。貢生。有香醉山房存稿。

新亭

話到新亭不忍登。六朝遺夢剩孤僧。永嘉人物知餘幾。依舊江光一片澄。

楊炤一首

炤字明遠。先世清江人。移居長洲。處士補子。有懷古堂詩五十卷。

有學集。明遠高才。盛年遁迹。自引疏布不厭。妻子凍餒。長篇短詠。矢詩逢歌。響振林木。

徐柯□□潛夫在髻髻。能誦陶杜詩。爲五言有警句。父友上元顧與治。高澹邢孟貞咸嘆異之。甲申乙酉之際。潛夫歸鄧尉山。爲終隱計。肆力於詩。規模少陵。字櫛句比。不失尺寸。故其所得。真率渾成。絕去雕飾。虞山錢宗伯故善其父古農。見潛夫詩。益喜。且高其志。爲序而刻之。有魯兩生漢四老之目。虞山沒。婁東吳司成。王奉常亦稱焉。而尤爲甯都曾燦。益都孫賓侗。萊陽宋琬所激賞。潛夫專摩少陵。爲詩史之學。五十年中。市朝改易。陵谷變遷。寓其感憤。皆於詩乎發之。至二千餘首。都爲五十卷。有爲之言爲多。

靜志居詩話。明遠詩評者比之雪山醜。吾嫌其太滑。

田按。明遠父子。偕隱陸墓。邢石白贈日補詩云。尙憶南徐別。春風五六年。生涯牛口下。衰齒雁行先。羨爾移耕具。將家稅野田。

相過懸一葉。已到鹿門前。又酬明遠詩云。亦是衡門士。寸心有所期。郊扉常獨掩。樂與州府辭。可以想其高致。

### 寄徐昭法

卜宅聞君在上沙。共言此地最清嘉。山田秋斂家藏米。園戶春深人採茶。杯蟻綠時浮竹葉。樹雞黃處落松花。逃名鹿豕爲羣久。過客休題高士家。

### 車以遵一首

以遵字孝思。一字孝則。邵陽人。參議大任子。諸生有聲香閣草。高霞堂正續集。

陶汝箴褐玉堂集。孝思生於閩。長於吳。越。老於楚。南。其文與人俱翩翩。有凌雲氣。

楚風補。高霞居士。著述甚富。早年與鍾譚齊名。屢經辟舉不就。亦玩世逸民也。

田按。孝思楚人。知有鍾譚而已。古詩亦有真氣。

### 日復一日行

一日復一日。牽絲不盈疋。三萬六千場。眼見有時畢。蒼海爲桑田。此度已非一。老子念孫子。孫子復見憶。古之大聖賢。各自有苗裔。叶及乎千百年。莫知所自出。朝兮如是朝。夕兮如是夕。此日未足多。此日已可惜。勞勞百年心。宛轉爲誰役。

### 蔣之翹三首

之翹字楚稷秀水布衣。

靜志居詩話楚稷輯李詩乘四十卷搜錄鄉黨先正詩無遺兼能備舉軼事使聽者忘倦晚年無子書籍散佚無餘詩乘亦亡可嘆也。

始春日送陸韋公之淮西

乍逢旋別正初春。冷落梅花解笑人。千里江關謀食計。十年烽火苦吟身。交當歧路尤堪重。文至窮時自有神。漫爾離尊何所指。黃雲甲馬故酸辛。

詠陸鈿故居

感慨黃公墟。況從聞笛處。羈魂渺難招。日墮淮西樹。

忠孝堂有序

南宋有陶姓將仕郎。扈從南來。卜居於王江涇三世矣。宋末嘗輸粟集鄉兵禦元。宋亡戒子孫無得仕。作忠孝堂以見志。藝菊千本。五色粲然。自號菊隱。

錢塘王氣已銷沈。草野猶存報國心。不負柴桑老孫子。冷香秋色一堂深。

路澤農一首

澤農字吾徵。一字安卿。曲周人。

遊西山

削壁懸空外。孤筇入斷雲。峯垂紅樹接。石亂碧流分。衰足行多歇。天風定亦聞。幾時攜素侶。終日坐秋雲。

程奎一首

奎、徽州人。

卽事

歌舞叢中度歲華。一朝忽去抱琵琶。前身定是烏衣燕。不入王家入謝家。

靜志居詩話。崇禎癸未。湖廣巡撫宋一鶴敗。家屬沒官。有妾金陵陳氏。以色藝聞。門客王屋聘焉。謝參政上選先期娶之。奎因作詩嘲笑。一時爭傳誦云。

屠爨一首

爨、字闇伯。嘉興人。諸生。有大經堂集。

靜志居詩話。闇伯言無枝葉。行有規矩。詩亦雅正。不以風華見長。

梅里詩輯。闇伯鼎革後絕意進取。張考夫題其所居云。霍原六聘山。焦先三詔洞。漁子定迷津。遮莫桃花種。高致可想。

過嚴先生祠

江水日夜流。揚舲漸迴遠。丹屏阻層巒。高墳隱深阪。灌木縈行雲。凝睇何繾綣。抗手發長謠。髣髴見遺範。



策吾鹽車足。豈嗟年歲晚。

李麟友一首

麟友字振公。一字于苑。嘉興布衣。有醒齋詩草。

春暮有懷朱十彝尊客越

飛花三月暮。春色滿江關。芳草天涯路。王孫去不還。

李生乾一首

生乾字梓甫。鄞人。

送朱廣文

夙有蘭蓀契。仍同汗漫遊。相看俱短髮。不繫是孤舟。道直傷如砥。途窮只敝裘。莫須悲去住。吾道在滄洲。

楊連吉一首

連吉字彙征。卽墨人。諸生。有悠然廬集。

村居

寂寂山村僻。居鄰不數家。柴門終日閉。生事任年華。細雨滋秋草。緒風開野花。邇來從吾懶。常是對煙霞。

徐篤一首

篤字行之。曹州人。諸生。有墨莊詩草。

春日懷邱子星

把酒不成醉。物華空眼前。向來同意氣。別去廢詩篇。芳杜愁無賴。垂楊春可憐。美人竟何許。望斷楚雲天。

葉有馨一首

有馨字予聞。吳人。有咸悅堂集。

登靈巖山

吳王宮館空山曲。西施洞口春草綠。昔日雕闌凭翠娥。今日招提散金粟。古藤離纜覆井床。轆轤素綆動寒光。山前一片五湖水。琉璃萬頃空蒼茫。點點羣峰噴白霧。隱隱漁舟間煙樹。青楓碧柳越來溪。平沙欹石鷗夷墓。江南二月花如茵。江南三月花撲人。嬌歌豔舞可長樂。吳王宮館無黃塵。

何蔚文一首

蔚文字穉元。浪穹人。

田按。穉元有句云。夕陽僧影淡。一笑菊花秋。饒有別趣。

偶爾

偶爾看秋色。茶鐺借石支。吟詩翻白俗。學畫愛黃癡。南畝禾將刈。東籬菊弄姿。何妨留雅客。是我不窮時。

徐濟忠一首

濟忠字良夫。又字子公。常熟人。有綴閒集。

田接子公。馮蒼已師也。有碧戶二十八韻。輕豔之作。已導二馮先路。

聽吳澹如歌

避暑當清夜。邀歌宴上才。美人殊自愛。坐客敢頻催。發口芳蘭襲。滿天涼露來。簫聲追不得。餘韻月徘徊。

何大成一首

大成字君立。晚自稱慈公。常熟人。

寒雨

檐溜似人語。催愁攪夢魂。村雞曉不曙。野火燎仍昏。有病欺貧老。無家活子孫。明晨羞攬鏡。有雪入髭根。

邵濂二首

濂字茂齊。一字齊周。常熟人。諸生。

養疴

造物藏吾拙。山林合養疴。依雲攤枕席。過雨坐松蘿。自識三心淨。無妨八苦多。蕭然方丈室。應似老維摩。

梳髮

髮白眞堪惜。蕭蕭可奈何。西風吹病樹。殘葉苦無多。

陸來三首

來字陶孺吳人。

題招隱園賦贈席獻臣朝宗昆季

傍岩倚樹結檐楹。憑仗高人得隱名。最喜風流承內史。園爲王中翰延陵所構。卻防徵召出承明。短垣常放青山入。

曲檻頻留野鶴行。竹戶松關行徑絕。墅猿攜石置碁枰。

半塘樓小飲

酒旆高懸七里隄。登樓頻喚酒家奚。燕知社日歸來早。花爲春寒不放齊。佳節屢過人漸老。名山相對日初西。人生那得常如此。莫惜樽前醉似泥。

玄妙觀贈陶鍊師

杖藜何處覓仙桃。玉洞飛花近市橋。絳簡書傳開石室。步虛聲響接雲霄。香生寶鼎丹初轉。名列蓬壺路不遙。讀罷黃庭佳客至。星壇可使挂詩瓢。



# 明詩紀事卷三十二

## 辛籤

華淑二首

淑字聞修無錫人。

列朝詩集聞修讀書惠山之下肆力古學取古人詩與本朝作者下上揚挖其詩以清新深婉爲宗雖問津於時人而能不墮其鬼趣嘗自敘其詩曰吾不取一時之好冀千百年後有一人知我千百帙中存其一帙千百篇中存其一篇而吾二十餘年心血或藉此一帙一篇以傳噫聞修已矣其所謂一帙一篇者庶其在是乎

草臣心甫聽雲晚過斷園次心甫韻

殘暉如月尙招尋。同侶夷猶興易淫。荒徑但容逋客往。開門一任綠煙深。流鶯入竹移雙影。鄰樹過牆落半陰。剩有微情委空觀。共君吟眺亦無心。

隄月聽蘇姬樓上理曲

高樓銀燭夜歡殘。一曲琵琶月下彈。拍遍閒聲人莫會。自將紅袖障春寒。

陳鴻五首

鴻字叔度侯官人有秋室篇

書影侯官陳叔度家貧無人物色之曹能始石倉園在洪塘中有森閣集諸同人爲詩叔度有一山在水次終日有泉聲句能始嘆賞爲之延譽因卽以石倉爲居停名其詩曰秋室篇取李長吉秋室之中無俗聲也丙戌之變能始殉節叔度年七十二不能自存以貧病死無子不能葬戊子予入閩時客以其詩來予悲其蒿露謂客曰予任其葬子任其詩因助以金浼諸生徐存永董其事先是莆田布衣趙十五名璧亦工詩善畫枯木竹石閩人珍之然性孤僻不多爲人作惟山房寺壁則淋漓瀉墨與叔度先後死亦不能葬存永因舉十五之棺與叔度合葬於小西湖之側予爲書碑曰明詩人陳叔度趙十五合墓客刻叔度集予爲之序板式精好傳之南中莫不知閩有陳叔度矣十五不多爲詩無傳者

十五國風高言集田髡淵曰叔度詩神理既清丰神復秀記貞心於妍貌隱摯念於簡言董倉水曰叔度詩清思泉湧麗句綺合風調流利蘊藉有餘

燒香詞

玉爐桂火微不煖雲母屏開月華滿永夜銀床怨合歡襪羅起踏秋空寒珠簾半捲桐陰綠卻恨明璫聲斷續心事悠悠寶鴨知涼風綉帶輕相吹

九日懷輿公

遠別又重陽依依劍水長客魂消此日秋色過他鄉野店寒多雨山城夜欲霜一尊花下酒誰對紫萸香

聽泉閣

風露臨虛閣。應涵秋氣清。一山在水次。終日有泉聲。響逐僧鐘落。寒隨客枕生。中宵滿欄月。都作玉琴鳴。

衰柳

依依芳質怨年華。卻憶深藏小小家。委地誰憐曬露葉。隔江偏妬拒霜花。淒涼舊巷空嘶馬。搖落長隄尙聚鴉。不似漢宮寒食候。東風輕送萬條斜。

淮陰旅懷

一帶淮聲繞郭流。黃昏人上水邊樓。經時尺素稀聞句。此夜孤燈隔楚州。楊柳已凋終綰恨。蘼蕪雖死亦關愁。客心處處驚搖落。古壁西風蟋蟀秋。

王彥泓二首

彥泓字次回。金壇人。以歲貢爲華亭訓導。有疑雨集。

列朝詩集。次回恭簡公樵諸孫。博學好古。詩多豔體。格調似韓致光。

靜志居詩話。風懷之作。段柯古紅樓集不可得見矣。存者玉溪生最擅場。韓冬郎次之。由其絃情不露。用事豔逸。造語新柔。所以擅絕也。後之爲此體者。言之惟恐不盡。詩焉得工。故必琴瑟鐘鼓之樂少。而寤寐反側之情多。然後可以追韓軼李。金沙王次回結撰深得唐人遺意。誦之感心。矚目。迴腸蕩氣。

田按。錄詩不廢桑中。可以爲戒也。後之爲豔詩者。幾於勸矣。余錄次回詩。以備一格。警鼎者知一嚮足矣。

爐節江邊讌集



喚得秋孃渡口船。竹西歌吹傍江煙。欹斜帽影調鸚夜。清脆鈴聲放鴿天。香餅煖烘桃葉袖。墨花狂污薛濤箋。青舟莫負開爐節。繡被濃熏一夕眠。

對花雜慟

瓊香一片委輕埃。猶憶春時傍砌開。腸斷江南陳叔寶。麗華身後卻歸來。

張維二首

維字叔維常熟人。

懷舊集。叔維習畫。善吹洞簫。度南曲。極要眇之致。爲人孤介。少不會意。輒傲然獨往。遺詩落落清泚。如其人。

吳江道中

荒村烟白遠連天。依約人家葦荻邊。忽聽榜歌何處發。前溪深柳出漁船。

訪萍踪師卽事

石轉溪迴澗幾重。門前一徑度深松。老僧獨立斜陽裏。閒撥藤花認鶴蹤。

何述臬一首

述臬字公邁常熟人。

懷舊集。何君公邁娶於秦。名淑。季公之孫女也。君之王父名鎔。與季公俱讀書。善草隸。故夫婦俱知書。君亦善八分。秦瀾推婉。

麗。夫婦有秦徐之好。家蓄古鏡可愛玩。君與婦誓指鏡爲誓。約同生死。壬午年。邑中大疫。君遭應。劉之戚。秦遂破鏡。半貯棺。半繫臂。裂帛自縊。家人持之不得決。乃笑曰。吾志不負昔。若能強我飯乎。以遺孤。託其夫之兄弟。不食十二日而卒。臨歿。盡毀其贈答諸篇。故秦詩不存。嗚呼。徐媛傷生。不載苑史。劉子玄以爲讖。以秦較之。烈殆過焉。埋沒草野。逢此世難。表章何年。予故識之。以俟後世。

田按。秦淑事。明史未採。已蒼懷舊集亦不甚傳。余錄於此集。以待後來之編史者。

### 秋原晚望

如何脈脈此心中。四望迷離路轉窮。曉夢但隨歸燕遠。秋思難寄逝波東。愁和烟靄山山紫。淚染枝頭葉葉紅。想得宵來眉黛淺。莫教纖月度簾櫳。

### 錢孫艾一首

孫艾字頤仲。常熟人。處士謙貞子。

### 甲申夏月飲集張氏池亭次伯兄韻

臨水亭臺觸處涼。芰荷香裏趁殘陽。山川入目都成恨。風景驚心更斷腸。瘦骨未堪波影照。閒情聊逐酒杯忙。不知歡會還多少。珍重銀蟾欲到牆。

### 徐錫祚二首

錫祚一名于。字于王。常熟人。

列朝詩集于酷愛晚唐宋元詩多所採輯嘗集唐人句為百絕效李鄴嗣續集以悼歌伎王桂好事者猶傳之

春日漫興追和唐伯虎二首

不學尋真不坐禪。烏藤白袷且隨緣。有時貰酒呼鄰叟。排日尋花買釣船。鼠迹共依塵榻住。鶯聲欣傍小窗圓。阮生何事窮途哭。但坐茆茨便得仙。

少不如人不近名。臣今老矣一無能。長生敢慕金莖露。消渴寧思玉井冰。水榭看花春載妓。地爐煨芋夜留僧。往年舊侶崢嶸甚。片紙寒暄愧不曾。

秦徵蘭十二首

徵蘭字楚芳常熟人諸生。

靜志居詩話。德陵寔錄。為黑頭爰立者所擢。天啟四年七年事。遂爾遺佚。秦秀才宮詞。措摭禁庭瑣語。頗稱詳核。第合而觀之。嫌其述客魏居多。而事關德陵者寡。不無微憾耳。

田按。楚芳宮詞。傳為陳餘所擢。今據詩綜更正。

天啓宮詞十二首

寶冠隨獵競相誇。雲擁雙龍雉尾斜。衆裏閒評誰最稱。玉人含笑看高家。  
內臣所戴金絲束髮冠。舊有此式。至當時而加侈焉。蟒龍蟠繞。下加翠額。插雉尾。前捧朱纓。傍綴寶玉。王體乾輩侍駕圍獵。多戴之。兼衣窄袖戎衣。束小玉帶。着顏豐脰。最不雅觀。相當者惟高永壽一人而已。

秋風拂面獵場開。匹馬橫飛去復來。玉腕控絃親射殺。山呼未畢廠公回。上獵于寶善門。魏忠賢馳馬過。御前上惡而射之。馬中額立斃。

擊下叩首呼萬歲。忠賢快快稱病先還。印公廠公皆宮中稱忠賢之詞。

星君次第列銀光。丹陽記。齊高帝造銀光紙賜王僧虔。點將標題當飲章。名無可對口曰飲章。聖主青年方好武。卷頭先問

李天王。或有用水滂傳。星名配東林諸人。以供談諧之資。如托塔天王則李三才也。及時雨則葉向。李天王高也。崔呈秀得之名曰點將錄。佳紙細書。與天鑒錄同。付魏忠賢。忠賢乘間以達御覽。上不解托。

塔天王為何語。忠賢詳述溪東西移塔事。意欲上知東林強暴有如此。徒所當翦也。上傾聽嘖嘖。若恨不同時者。忠賢計阻。匿其書。逡巡而退。

無限春光轉眼空。尋思翻欲悔鋪宮。花容占斷君前豔。擢向雕檐細雨中。張裕妃被寵。客魏嫉之。既而有娠。鋪宮齊册妃禮。而過期不育。

二妃遂力譖於上。盡逐侍從。閉妃空宮。屏去水火者數日。妃餒甚。匍匐雨中。伏地啜露。水斗許。未及上階而卒。

萬幾餘畧建長廊。聖主經營食不遑。粉牆未乾宣十作。庀材重築蹴圓堂。聖性好營建。迴廊曲室。皆手操。斧鋸為之。然喜厭不恒。成而毀。

毀而復成。以是累歲卒未竣。功宮中舊有蹴圓亭。上又手造蹴圓堂。五間。高永壽。好蹴圓。踰故慈恩造堂。以習此戲。十作。內官監所轄。以給宮中營建之材料者。

異卉傳來自粵中。內官宣索種離宮。春風香豔知多少。一樹番蘭分外紅。當時都下植異種花草。相傳白。兩廣藥材中混至。內臣好事者。

遍栽於聖駕常幸之處。有蛺蝶菊。紅水仙。番蘭。柿等名。番蘭。紅花碧葉。上愛而玩之。移供案間。或云。即美人蕉。

貼裏三欄夾裏花。中官應節鬪豪華。因逢廟忌更青素。瑟瑟波紋襯海霞。紅蟒貼裏。貴近臣內衣也。諸櫛。瑤皆衣之色。之淺深。隨時異宜。

又於貂襪下加一襪。名曰三襪。又瓶為雙。襪。蟒衣兩袖各加一蟒。舊制。遇大忌辰及修省。中官衣青素。襪廟忌。辰衣青綠。花樣所謂青素者。夏則屯絹。冬則元色。紵也。當時用天青竹綠花紗羅。當青素。襯海天。

覆色淺紅裏衣。內外掩映。望之如波紋木理焉。

封事連章奏至尊。宮前暫罷選龍孫。青海之外。馬多龍種。名曰龍孫。角羊斑鹿分收過。千騎雲屯北上門。內官有陞騎馬者。凡遇慶典。人進馬一匹。駕御乾清宮門。覽畢。付御馬監。本官給賞。馬不堪用。該監不收。換補。大內官賞過。祿米者。亦於是日進一羊一鹿。鹿必大白。斑羊必四角六角。鹿付南海子。羊付牲口房。此舊例也。魏忠賢因各邊缺馬。蹶陞騎馬數百人。每歲進十餘次。每次千餘匹。臨期忠賢不復奏聞。竟自至上門。盛服危坐。按職名牽馬魚貫而進。不堪用者。重加責處。於是馬價倍昔。

玉兔迎霜秋宴開。花城侍宴暫徘徊。蕙蘭香細鶯聲軟。報到高家小姐來。重陽前後。內官設宴相邀。謂之好事者。繞屋列菊花數十餘層。後者軒前者。輕望之若山坡。五色燦爛無隙。名曰花城。御前牌子。高永壽年未弱冠。丹脣鮮眸。皎好若處子。宮中稱高小姐。宴飲之際。高或不與。合座為之不歡。

坤寧花落砌痕斑。書卷爐香伴玉顏。鏡裏尋思燈伴語。承恩端不為幽閒。張后既失寵。絕不露怨望之色。語。

畫裏明妃絕代無。琵琶千騎擁雲茶。君王不愛傾城色。只看猙獰揭盃圖。李伯時畫昭君出塞八幅。趙子藏舊物也。兩種並陳。上恆棄此。取彼。聖性樂觀險怪之狀。而厭近窳突。略見於此。

分明角勝厭棋枰。井字闌旁鬪棹城。十五燕姬偏慧黠。雙拋常占上中營。神廟中葉。御意。瓶為棹。成之戲。中一營為上營。四方四營為中營。四角四營為下營。命宮人持銀錢。或小銀。毬擲之。落上營。賞銀九兩。中營六兩。下營三兩。落營外。或落井字。上罰如中營。所賞之數。雙擲賞罰皆倍。由是諸宮爭效之。至戊午。邊事大壞。說者謂棹城者。掠城也。殆先徵云。天啟時。猶沿之。烈皇帝登極。禁止。

林雲鳳二首

雲鳳字若撫。長洲人。

書影吳門林若撫老而工詩滄桑後。匿影田間雖甚貧。不一謁顯貴。庚午秋吳衆香開星社於高座寺。時社惟予與餘姚黃太冲。桐城吳子遠年皆十九。若撫賦詩贈予輩曰。白社初開士景從。同年同調更難逢。誰家得種三珠樹。老我如登羣玉峯。書寄西池非匹鳥。席分東漢有全龍。慈恩他日題名處。十九人中肯見容。

靜志居詩話。若撫當鍾譚譚張之日。守正不回。詩篇極其繁富。惜知者寥寥。困阮終老。相如遺草。已不可問矣。

### 暮秋同姜如須林衡者顧茂倫登虎邱

虎邱名勝虎谿同。載酒重來問遠公。草木正逢黃落後。樓臺多在翠微中。池深暗受三秋雨。塔迥虛含萬里風。此日登臨須盡醉。莫教搔首嘆飛蓬。

### 送春

香隨燕子入春泥。忍向尊前唱大隄。暗水尚流花徑曲。斜陽不盡草亭西。鳥如惜別聲偏澀。山亦含顰黛欲低。老我將歸仍戀戀。醉中得句醉中題。

### 王邦畿三首

邦畿字說作番禺人。貢生。有耳鳴集。

有學集。王君詩學殖富。意匠深。雲浮臍流。殆將別出於諸君子之間。

徧行堂集。說作詩諸體皆工。其五七言律。真足奪王孟之席。

漁洋詩話。東粵詩。自屈梁程陳之外。又有王說作。王震生。陳翁生。伍鐵山。數人。皆有可傳。說作句如雲低滄海樹。潮上夕陽城。

留別  
曙色寒山外。秋風古渡前。殊近錢劉。又有絕句云。昨冬歸去。今春信。言是端陽入楚山。吟取荊州舊時事。洞庭秋盡客應還。

落日荒郊遠。高天古渡寒。未潮先候信。有酒且同歡。水白漁燈溼。霜黃海氣乾。鄉心與朋好。去住兩情難。

出門

昨日方還里。今朝又出門。飢寒能迫我。辛苦復何言。疲馬斜陽路。深煙遠樹村。不勞人重問。芳草識王孫。

江城三月曲

江天漠漠雁鴻飛。草色青青麥葉稀。猶憶溪邊舊時節。杏花三月鯉魚肥。

薛始亨二首

始亨字剛生。廣州順德人。諸生。有南枝堂集。

廣東詩粹。剛生博學好奇節。遭亂匿迹山林。自號二樵山人。

詠懷

促織助貧女。方寒憂授衣。杼軸有時歇。中宵鳴更悲。借問裁縫成。爾寧預寸絲。舍緯恤宗周。嘗聞有婦嫠。賦性各有異。何必俱懷私。

晚出尋梁海曲

江上初有月。獨行尋故人。蟲聲出露草。漁火隔煙津。門有歸農過。家爲廢圃鄰。夫君顏色好。長嘯倚松筠。

吳淹一首

淹字德亨歙人。

田雀

黍田早歸來。卑棲在荆棘。莫啄秋紅子。留作寒冬食。

吳濡三首

濡字德裕歙人。

題畫三首

雨晴春又晚。纔試踏青鞋。野碓雲舂石。山溪水放簾。歲豐饒地利。城遠少官差。彷彿武陵境。桃花放兩涯。  
楊花如雪落。風色轉南薰。野店雲埋徑。山家竹護門。晚行嫌虎迹。倦憩喜禽言。驛舍曾經過。題詩壁尙存。  
草堂新卜築。渾似杜陵莊。溪澗秋無雨。林疏夜有霜。杖藜隨鶴步。坐石看雲翔。心迹天遊契。風清兩鬢霜。

劉元祥一首

元祥字瑞圃丹陽人。國子生。有待圃集。

春日遊惠山



招隄萬松裏。春日此幽探。雲氣流孤壑。湖光帶遠嵐。僧從花底出。禪向靜中參。醉倚紅亭望。漁歌落暮潭。

劉永滋一首

永滋字潤之寶應人。

過吳曰南故宅

南華山人去不回。茅龍誰復翦蒿萊。卻金亭上青青草。二月春風燕子來。

楊誌一首

誌字石甫當陽人諸生。

遊玉泉寺

鐘磬門初啓。松蘿道半遮。泉清堪洗耳。地勝欲移家。客指前朝鼎。僧傳乳鉢茶。未須求證果。生滅在聞鴉。

王璉一首

璉字崇樸黃巖人。有一笑軒稿。

毘陵驛

三冬雨絕河水乾。毘陵驛前舟可憐。越客琴書懷遠道。吳門冰雪傍殘年。幾家砧杵寒城外。何處漁歌夕照邊。濁酒可沽須盡醉。旅愁今夜正紛然。

周書一首

書字一中臨海人。

答裘慕山

雨過邱園花事稀。深春猶自滯歸期。秋風匹馬兩年別。清夜月明千里思。芳草欲迷南浦路。白雲旋長北山薇。盛朝公論應長在。不信高才尙忤時。

楊靜一首

靜字定夫常熟人知縣彝子。

田按定夫年二十二而卒能詩文父彝將之令都昌以定夫歿罷往踰年都昌陷顧麟士有詩云罷令人猶歎未行旋聞賊已陷孤城臣忠敢不爲君死子天方知代父生一室餘魂聞涕淚萬邦多難望昇平由來倚伏皆無定豈但應寬抵犢情定夫有遠識嘗曰邊鄙日蹙國勢日危社稷已爲虛器而儒生猶持干祿之文日吟哦之至於時政兵謀一切不省一旦賊人渡河士無選鋒城無堅壘將與造化者遊於無何有之鄉君父且不可得而況名與富貴乎定夫死之三年乃當甲申卒一一如其言云。

懷人

閒來託思在天涯。落落河山重可嗟。留客未懸徐孺榻。憂時終望范滂車。寒雲晚送機峰翠。春雨晨催蔣徑花。四海只今戎馬隔。故人才筆自風華。

程梧一首

梧字來鳳。休寧人。

莊居初夏

山屏寂寂竹籬短。榴花枳花相映開。低枝巢鳥人不取。日日將雛自去來。

程廷橈一首

廷橈字用達。休寧人。

閨情

落花時節雨霏微。翦翦輕寒透縠衣。燕子不知離別恨。雙雙常遶繡簾飛。

程九皋二首

九皋字子方。休寧人。有潭西樓稿。

橫山北築

幾入山中去。幽偏好避名。谷空嘯鳥寂。風靜落花輕。一水斜通澗。千峰曲抱城。應忘去與住。世事不關情。

山居吟

青嶂高不極。白雲深更深。牽蘿堪補屋。種樹已成林。午夢鳥能喚。秋懷蛩解吟。此中有真趣。誰識出塵心。

錢秉鐔一首

秉鐔字幼安桐城人。

山中看桂喜友人見過時舍弟滯嶺外

山中無故友。叢桂足相知。人老兵戈裏。花殘杯酒時。淮南消息好。嶺外雁鴻稀。明月猶堪賞。還期一扣扉。

齊程一首

程初名維程字子安更名後改字遜元桐城人。

望南畿

鍾陵淮海門通。吳楚煙波一望中。鐵鎖夜銷寒浸月。戈船朝駛浪迴風。襜褕戰士歌江北。刺繡明珠怨大東。漢使節符曾不至。逍遙河上立奇功。

方穀一首

穀字子桓桐城人諸生。

白帝子歌

四維茫茫渺難極。載方舟兮沿水入。神女璇宮當夜織。倚瑟鳴絃聲清歷。知音娛樂恣歡翕。遊放滄湄何所息。



# 明詩紀事卷三十三

## 辛籤

吳用鈇一首

用鈇字士衡桐城人以蔭除內閣中書

金陵懷古

一曲歌殘王氣銷臨春春盡草蕭蕭軍書床下函仍閉鐵騎城中檠已調玉璽驟驚歸北國美人猶自說南朝賞心亭畔孤魂在寒雨淒風自寂寥

彭堯諭一首

堯諭字君宜夏邑人官南昌通判有西園公子集

書影彭堯諭余鄉夏邑人工爲詩多讀書有氣調常遊京師遇竟陵鍾惺與談不合奮拳殿之可一笑也

鏤金老人行

鏤金匠作口無食泣向街頭賣弱息自言少時侍先皇金珠日費千萬億宮內大璫貢獻多盤龍結鳳人巧極通明鱗甲儼生成飛動天吳絕雕刻製成獻入未央宮未必至尊迴顏色當時酬價比黃金眼前顧

盼生羽翼。今上御極聖且仁。諸璫斂手皆潛匿。我輩技窮饑欲死。奇珍不獻君王側。老人賣兒將買贖。明日城南親稼穡。我聞此語感聖恩。不將翫好窮民力。黃金土賤埋人間。此老力耕計良得。

鄧祥麟一首

祥麟字玉書。一字子與。武岡州人。一作新寧人。官岷府長史。一作官審理。

沅湘耆舊集。玉書工詩善畫。書法絕類二王。鼎革後。結廬新寧之石田鵝峰山下。時釋一念以上元將家子祝髮南岳。寓新寧獅潭閣。玉書與爲方外交。一念死。哭以詩。并編其集。

輓一念和尚

相逢廿載不言家。頗道鄉園近雨花。老向金城常賣藥。閒依石鼎獨烹茶。窗櫺尙放江光入。几榻猶邀竹影遮。滿室香燈歸幻寂。春風一塔繞鸞鴉。

陳濟生一首

濟生字皇士。長洲人。祭酒仁錫子。官太僕寺丞。

三岡識略。吳門陳濟生。陳公仁錫之子也。懷宗沒年。曾刊啟禎詩選。序吳相國牲所作。中有二祖列宗語。奸人沈天甫。呂中夏。麟奇以爲奇貨。挾詩索多金。不遂。令僕葉大出首刻造逆書。詆譭本朝。詩册列名七百餘人。宜遣官提訊。旋奉上傳。天甫等所。指事絕無憑據。編詩之陳濟生。久經物故。帶詩之施明。又經逃遁。顯係奸徒扛扶挾詐。俱斬東市。是舉也。一則解文字之禍。一以杜告訐之門。衆共快之。麟奇我郡明經。不知何苦而爲此也。

靜志居詩話。皇土經亂歸田。緝啟禎兩朝遺詩。又命工傳寫明三百年來忠臣義士像。裝以爲冊。可稱好事矣。惜其詩鏤板未終。而像亦爲蠹魚所蝕。覽觀者惜焉。

### 遊仙詩

枕上廬山枕下江。經年高臥碧淙淙。黃羊叱起成千隊。青鳥飛來更一雙。髣髴眞仙能送酒。玲瓏玉女解開窗。只嫌李白多豪氣。一點雄心未肯降。

### 劉昌運一首

昌運字明卿。如皋人。貢生。除寧國教授。有味古堂集。

### 渡江

舟下江流急。望中日已斜。入雲惟鳥道。傍水少人家。隱見看山色。浮沈逐浪花。片帆吳地近。到岸卽天涯。

### 黃翼聖四首

翼聖字子羽。太倉州人。以薦授新都知縣。遷安吉知州。有蓮蕊居士詩選。

有學集。子羽爲人孝友。順祥。自牧若處女。居官□難著事。以廉辦聞。晚而修香光之業。爲詩清新有雅思。序而定之者。徐元歎也。

### 壽家奉倩初度二首

看看竹馬事嬉遊。此日樽前共白頭。兄健轉嫌增弟老。國亡何忍爲家謀。譜成節烈平生事。賣剩田園數



畝秋。一任時人笑癡絕。五更頻夢復神州。

吟聳雙肩骨帶仙。亂離贏得一身全。郊增新鬼多吾友。籍入遺民亦信天。蕭散別裁方外服。團圓常說在家禪。不須更覓長生訣。學得饑飧與困眠。

和范石湖田園雜興

谿鳥谿雲莫浪猜。更無名利到胸懷。倦腰每仗藤扶起。還恨當年五斗來。暮雪如籊雨半兼。石坡荒澹竹廉纖。小窗自愛雲林畫。冷逼匡床不下簾。

閃知愿一首

知愿、江寧人。桂王時官待詔。

天涯

天涯萬里病如僧。變舞蠻歌醉未能。獨向點蒼山上望。浮雲何處是金陵。

談亮一首

亮字晉若。富順人。桂王時授義寧知縣。遷麻哈知州。入國朝。削髮爲僧。居遵義臺山寺。有賣閒愁錄。

書瀝膽將軍遺事後

銅鑼木梃荷神船奔走離奇過四年。一片御衣歸不得。孤臣何處哭殘天。

陳啟相平水集。黎維祚字名遠。江津人。幼不肯竟學。惟卜算形家是就。遭亂轉徙。家遵義。會永歷狩。時諸爵鎮將各擁衆拒守。維祚憤惋號泣。徧走告以大義。皆忻幸。各密草迎鑾奏付達。維祚乃合諸奏。竅木梃三尺許。藏其中。用荷蓀鑑等物。挾衛以行。時庚子正月二十二日也。至辛丑九月十八日。抵孟良府。說晉藩李定國。晉藩色動。維祚破梃出諸奏。相示。晉藩義之。十月六日。給以令諭一道轉奏。時駕在阿瓦城。城左右夾河。洪波浩渺。相距五六日程。祇聲息通。主臣不得見。隨奉勅云。皇帝密勅。瀝膽將軍黎維祚。據晉藩奏。爾忠肝貫日。義膽渾身。穿虎豹。趨宸極。烈風勁草。殊軫朕懷。茲授爾瀝膽將軍。督理滇黔楚蜀。徧勵諸助將士山林隱逸等。謹慎固防。枕戈以俟。候晉鞏兩藩舉師。四路策應。旦夕是圖。勿遲勿忽。十月十五日拜受訖。並收空旨百道。印三顆。造複底小舟密藏之。木刊諸神像。擊小鉦鑼。肩唱以行。晉藩大喜。以旌甲擁至通界。始改裝反報諸營。冬十一月。復入緬復命。比至騰越。時晉藩馳約鞏藩白文選。共攻阿瓦。阿瓦木城七里。已破其三。夷曰。汝不過欲見乃皇帝耳。幾年和好。一朝背棄。何益。姑止攻三日。當送出。否則我亦有變計。一任汝爲。不得已從之。閱二日。右河船密如木葉。內外夾攻。兩藩覆沒幾盡。自是兩藩分散。晉徙他夷所。鞏謀恢復。據騰越。馬寶與鞏素善。詣白營遙呼曰。我隻身來說好話者。諸軍勿動。遂入相見。告以密謀。言吳願與白合。白受所給。有艾將軍者。滿洲人。亦懼約附從。相與鑽刀歃血。會上由別道亦爲緬夷送出。居草殿三間。白兵環其外。吳兵又環之。維祚至艾道入見。上見維祚。大哭。維祚泣曰。事今至此。臣維急奔告諸營。整兵於要道接駕。上曰。兒子。爾可致意十五家等。若能救我出。我只願修行去。哽咽不能言。手翦御衣一片。密寫敕付卽行。晝夜兼行。抵荆侯營。謀共於徧橋接駕。復入滇偵探。駕已崩於壬寅三月矣。維祚呼天搶地。恨不卽刺刃吳逆之胸。莽狂遯去。不知所終。

陳啓相一首

啓相字枚庵富順人。僑寓遵義貢生。桂王時授河南道御史。入國朝削髮爲僧。更名聖符。號大友。居掌臺山寺。自稱掌山老人。有平水集。

黔詩紀略。枚庵康熙壬寅來遵義。隱縣南平水里掌臺山寺。足不越戶者將三十年。有時饑寒。嘯歌自得。一編一鉢。蕭然人外。

九日

黑雲如甕箚光寒。一盞醪唇醉不堪。報道蟹肥新釀熟。雨中清夢足江南。

# 明詩紀事卷三十四

辛籤

傅爾元一首

爾元字澹方桐梓人崇禎中拔貢有居易堂集。

黔詩紀略澹方少年英異四川提學錢邦芑目爲蜀才第二邦芑隱餘慶之蒲村復負笈從之遊居易堂詩涉筆生硬情味滑乏而陵風骨亦自不凡。

樹

花發老枝不醜。選巢多宿名禽。山人根底閒坐。綠葉棲煙自清。

王承之五首

承之字季安華陰人有澗辭十卷。

東陰商□□集王子詩凡夫纖尚淫曼之詞刻薄爾弱之格皆其所荷及而逐之者。

田按季安詩音調渾雅具有唐格關中詩人之秀。

姑蘇懷古

雲迷雪沒百花洲。響屐新糝乍可留。館娃煙靄還日夜。錦帆風雨空山邱。自來自去月如駛。那照吳王與西子。萬點殘鴉春殿飛。請君試聽宮前水。

七夕

河漢杳無際。涼風吹素秋。不知牛女恨。幾許別離愁。明月光初下。寒雲澹欲流。人間與天上。浩蕩總難酬。

同元昌兄尋山贈玄上人

尋幽千仞上。獨喜揖高僧。吳越經遊遍。湖山勝覽曾。長松分妙偈。明月澹秋燈。暫話浮生罷。天風散鬱蒸。家兄僕北歸先寄

一自河橋別。鄉園夢裏看。天寒爲客苦。地僻寄書難。遠樹分行直。嘯鴉落照殘。望中紛意緒。憑汝報平安。

銅雀臺

寶曆隨流水。春風斷綺羅。蛾眉今不見。鳳輦昔曾過。廢苑留山月。深宮半薜蘿。西陵松柏樹。猶挂暮雲多。

侯涵二首

涵初名泓。字研德。號掌亭。嘉定人。太學生岐曾子。諸生門人私謚貞憲先生。有掌亭集。

幾峰文鈔。研德受經陶菴黃先生之門。爲陶菴所引重。王師下江南。侯氏禍患踵至。從弟澗亡命。有司捕澗不獲。執研德應命。久然後得釋。性尤友愛。析產一切多寡肥瘠不較。字仲兄。遺腹子恩勝於己出。自少博覽強記。無所不通。討論天下大事。每豫

揣成敗亦無所不合。論詩則欲別裁僞體而極之自得。以爲苟自得之。師心可也。法古可也。苟無自得。法古非也。師心亦非也。於詩絕不苟作。或一日數篇。或經月不得一篇。所著掌亭集。凡若干卷。蓋自陶菴沒而研德繼之。諸儒稱能得師傳者。必首推研德云。

### 寄智舍弟

目斷秦庭馬角生。家山雲水各吞聲。三年一見無餘話。千里孤筇又獨行。未卜相逢空有約。莫輕此別遂無情。江潮海日題詩在。莫遣紅塵識姓名。

### 春感

江左君臣讌笑同。軍烽俄照石頭紅。金滕事秘河山改。玉樹歌殘禁苑空。九陌已沈青海日。六宮猶望錦帆風。祇今寒食鍾陵道。石馬何人指鬱葱。

### 顧在觀一首

在觀字觀生。松江華亭人。諸生。

王昶青浦詩傳。在觀博覽羣籍。教諭楊文驄重其才。命二子愛生。貞生師之。文驄薦置馬士英幕府。時寇盜充斥。士英裨將黃得功。劉澤清力戰淮。漕間常有克捷。而論者抨擊不休。士英患之。在觀曰。公素懷坦白。無所附麗。近昵懷密。衆情不免致疑耳。大鍼知之。深以爲恨。福王初。士英入相。在觀首以起用老成。分別邪正爲言。一時若嘉興徐石麒。會稽劉宗周。長洲徐沂。華亭許譽卿。夏允彝。陳子龍。並登啟事。而大鍼以名列瑣案。久爲士林不齒。思誣東林諸人。謀立他藩。以一網盡之。熈安遠侯柳某

上疏。又預詣士英第。屬以嚴切票擬。士英笑不應。大鍼怒曰。東林間諜坐在汝家。我固知無能爲也。在觀嘗語士英。大鍼得志。爲所欲爲。此事關公門戶。且以告士英子鑾。鑾幾諫。至於挽髮抱項。涕泣隨之。諸君子得以從容引退。未出亦各高臥里門。不致起同文黨綱之獄。在觀力也。

金陵懷古

十年不見石城秋。萬事皆隨江水流。晉代五龍空往讖。謝家雙燕有新愁。千門衰柳懸殘月。一劍清霜感敵裘。滿目相逢無限恨。那堪重上仲宣樓。

蔣易一首

易字前民。江都人。有石閭集。

遺民詩。前民與杜濬。王猷定友善。工五言律詩。筆畫。

清涼山頂留別于皇

招提上夕陽。別酒置崇岡。秋老孤帆色。人輕百戰場。江雲平楚岸。風葉減吳霜。來日空回首。思君獨渺茫。

沈祖孝二首

祖孝。初名果。字因生。一字雪樵。烏程人。有湖千硯庸。當泣陶年吟安。下簾等集。

靜志居詩話。雪樵至性之士。詩皆從肺腑流出。

白下懷顧茂倫湖上

白下孤筇亦浪遊。西湖有客共誰留。江山到處聊青眼。詩酒驅人愧白頭。弔古何須悲叔寶。乘時猶得數錢鏐。景陽煙滅寒潮斷。笳鼓年年滿越州。

九日同東籬登王老露臺

望裏雙峯夕照懸。一泓如鏡見湖天。風流老去應人後。雲物他鄉轉自憐。佳日有臺聊復爾。古人無酒亦淒然。白頭破帽垂垂立。憶得閒居陶令篇。

石可璽七首

可璽字石丈山陽人諸生。

養一齋詩話。吾鄉石石丈論詩云。今之作者。不附于瑯琊。北地。則附於公安。景陵。詩以位置性情。攘取他人之性情而私爲己有。尙得謂之有廉恥乎。昔鍾嶸司空圖皆作詩品二字。都排向外面去。石丈說到無廉恥上。方足爲詩品的解耳。

讀曲歌

人皆樂歡笑。郎獨無言語。非郎無言語。窺儂眉未許。

立秋前一日偕劉七成諸子飲黃居擬邸中喜春郎度曲

檐鈴風響亂松聲。涼月照人襟袖明。冷燭畫屏紅粉意。澹雲河漢故人情。潯陽舊淚弦中落。楚客新愁笛裏生。一夜清歌催木葉。明朝秋色滿江城。



湖居

暮色湖上來，遠天東漸小。一榻坐林中，停目數歸鳥。

舞陽令潘若稚同男孟觀死節三首若稚名宏孟觀名澄瀾

舌斷常山落日斜，空教明月冷齋衙。燕臺六月猶飛雪，春到河陽不敢花。  
司農有印佩軍門，城社雖墟氣已吞。到處血腥迷夜火，萬家風雨哭黃昏。  
雪埋烽火角聲殘，魂魄猶依洛水寒。月落千山夜臺冷，家山有夢不曾還。

養一齋詩話石丈弔潘若稚詩云蓋石丈明季諸生闖賊入京北向痛哭鬱鬱遂卒宜吐詞激烈如此

閱鼎一首

鼎字渭潢歙人有清話堂詩稿

遺民詩渭潢隱居江都性喜讀書常於廣庭設几席樹以紙屏人往來其側目不一顧兼精內典

懷南嶽遠菴和尚

迎師數千里，葉落洞庭湖。攜鉢猶爲累，居山誰與徒。詩懷秋月淡，禪性野雲孤。愧我淹塵世，終年此故吾。

沈叔竑一首

叔竑字宏度錢塘人

于忠肅祠

于公遺廟南山下。旌旆蕭森極望中。野老逢春常薦醴。石甍向晚自嘶風。人磨斷碣青霜冷。鳥啄荒苔碧瓦空。知倚遙天長劍動。暮雲殘照欲成虹。

李景福一首

景福原名澹。字梅隱。揚州興化人。諸生。

遺民詩梅隱甲申後學使者嚴檄促試以死辭隱居教授。

暮春遣意

三春看又盡。身世一飄萍。草識王孫意。花傷遊子情。殘燈和夢斷。濁酒帶愁傾。日月年將逝。悲歌送此生。

徐象婁一首

象婁字仲丙。榆林人。

秋興

江上何年別故人。臨流相憶淚沾巾。滄桑漫問當時事。湖海難容此日身。明月空林驚落葉。秋風短棹覓花津。自憐野性耽泉壑。豈有桃源可避秦。

邵似歐二首

似歐字之文一字漢功鄞人貢生

鮑琦亭集。邵尙書輔忠有子二。似歐。字之文。明經。似雍。字之堯。諸生同產七人中稱最秀。時吾鄉於附奄諸家。相疏斥之。並其子弟弗與還往。尙書尤爲清議所惡。而之文兄弟別具志節。不以家門見外。丙戌之文兄弟侍尙書大雷山中。微言勸尙書殉國。以蓋前過。不能得。已而故王栖泊潯州。石浦之間。兄弟竭力資其屏履。其後求周公囊雲銘尙書墓。囊雲直筆無所借。之文兄弟一慟而已。嗣是故國遺民至蛟關者。必登邵氏之堂。兄弟皆有集傳於後。

讀史二首

甘蹈東海死。恥尊秦爲帝。仲連一布衣。片言挾大義。當時諸侯王。奄奄無生氣。子房圖報韓。破產交俠客。椎秦中副車。十日索不得。奇人作快事。千古稱豪傑。圯橋一卷書。藉以興漢業。究竟非素懷。功成遂辟穀。此心誰得知。赤松與黃石。

顧超八首

超字子超吳人

靜志居詩話。韓高士洽有明詩存選本。其最心折者子超之長歌。大約兼仿溫飛卿。李長吉而神明之。惜其全棄求之不得。當崇禎之際。吳俗談詩者。多惑於楚咻。以空疏蕭寂相尙。子超出入經籍。卓然羣雅之遺。

龍渚

紫海珠作宮。方壺玉爲勝。不有金鐵舟。安能遂長往。蛟龍走如絲。雷電縮于盎。高掇翡翠巢。俯褰珊瑚網。

馮夷仰面颺。濡足不敢上。我欲呼巨靈。玲瓏納諸掌。

鍊墩

黃鶴委羽處。雲浪高千尺。聞說香采人。時逢弄珠客。磯頭燕麥青。鷗背漁天白。陰火然積砂。迴風響秋碧。一棹尙可浮。三返殊未昔。

張祐別業

寂寂巖前花。香散春無奈。當年作賦人。遺宅生秋籟。抱犢溪澗中。尋僧水雲外。天子不見收。名交竟何賴。留得草青青。相傳作書帶。

寒夜曲

霜月皎皎睡未能。醉眼莫辨光峻嶒。紫梅吹破繭窗雪。翠竹戛斷風檐冰。琉璃凍碎膽瓶裂。漏水膠殘銀箭折。簾鉤多事鶴無聊。四壁清香幾曾絕。西鄰美人閒金屋。繡被錦纏半牀玉。金爐火滅難再溫。不畏天寒畏獨宿。兩心相隔無路通。一夜相思空熱中。安得東風早吹拂。先傳煖氣入房櫳。

柳毅井

仙郎怨別龍閨曉。肉麟騎出星潭早。颺穿水母秋一泓。世上餅壘逐雲擾。高天露滴桐陰密。碧氣吹香湖上橘。玉罌牽斷九秋絲。古鏡照寒千歲漆。瀟湘帝子洞庭君。朝來出雨暮出雲。我有尺素不可將。還家且

放青溪羊。

寺夜有懷二首

團扇初涼怨未休。尺書裁就獨緘愁。青蟲飛散綠窗雨。白雁叫殘紅蓼秋。病裏看山惟落葉。夢中尋客亦登樓。離騷久不輕開卷。今日張燈讀遠遊。

水滴蓮花夜未央。篆香銷盡九迴腸。僧於寂寞翻殘課。我以相思怨夕陽。零雨敗蕉淒暗壁。荒鷄疏磬隔橫塘。林風乍息高窗白。十里蒼山一片霜。

哭吳生

玉藕銀塘映綺疏。鴛鴦樓上畫眉圖。無端擲碎遊仙枕。從此人間好夢無。

潘問奇五首

問奇字雪帆。錢塘布衣。有拜鵑堂集。

遺民詩。雪帆一生孤寂如僧。詩與田梅岑合刻。又著拜鵑堂草。客死揚州。太守傅澤洪重其人。葬之平山堂側。

夾山寺

窈窕來深谷。千峯繞寺平。墓田耕石骨。樵徑入松聲。地古春難到。山寒水自生。上方茶碗罷。塵夢此時清。

穎橋晚泊

黃昏到新息。此地古來荒。店小門臨樹。茅穿月射牀。青芻喧櫪馬。黑水度山狼。燭盡時聞柝。征人苦夜長。

自磁州趨邯鄲途中卽事

中宵聞鶯發。日出走黃沙。風力能飛石。河冰不陷車。郊寒騰俊鶻。樹老立飢鴉。傍午停征轡。炊煙得幾家。

讀史

昆池夜火失金川。望帝歸時化杜鵑。家譜縱編洪武紀。史書難革建文年。禍由疊錯雖無及。事續周公恐不然。誰向長陵求木石。西山老佛起新阡。

肅寧

縣有故璫魏忠賢第宅遺址尙存

肅寧池館舊連阡。過客追思鹿馬年。齊國豎刁呼尙父。漢時朝士拜中涓。北司計就書難上。元祐碑成事可憐。獨喜春來吳楚地。左楊祠火正喧闐。

李潛一首

潛字啓美。揚州興化人。有葉間齋稿。

宿清涼寺

人靜僧初定。山孤月半銜。石苔侵曲几。松雪點危巖。座上花宜散。塔前草莫芟。興來登北阜。目送大江帆。

張養重二首

養重字虞山山陽人

遺民詩虞山俠骨文心蚤有合響晚年詩愈豪品愈潔

雨中重過釣臺

再訪先生遇見難。空江風雨逼人寒。白雲中斷千峯樹。碧漲新添七里灘。只有陰晴隨箬笠。從無興廢到漁竿。回頭前日登臨地。烟滿雙臺何處看。

竹枝詞

蘄州竹簟涼于水。黃陂葛巾細于紗。晚來更挽高高髻。喚買街頭水桂花。

魏應星一首

應星字弁山揚州興化人

促織行

促織驚嬾婦。婦歎無所織。倚樓望明月。門戶生荆棘。今年絲雖貴。筐箱盈萬億。買絲忙上軸。軋軋無停息。豈不畏苦辛。將以謀生殖。秋風颯颯生。租吏相催逼。怒目坐我牀。懷中取官勅。攫去忍無言。禍至恐不測。爾蟲顧何知。夜夜鳴我側。嗚咽入空房。月暗風沙黑。

韋人鳳一首

人鳳字六象武康人。

遺民詩六象有盛名詩以蒼健爲骨秀美爲澤。

南山

家住南山下。荒村只敝廬。春風三徑草。夜雨半牀書。石戶藤花合。茅檐竹影疏。溪邊堪泛棹。欲傍五湖漁。

李瀚二首

瀚字士翔揚州興化人。

遺民詩士翔有才名爲文奇拔詩亦超越甲申後逃於禪具老人欲授以杖拂辭不受。

雨夜

積雨侵階滿。茅堂可浴鷗。妻孥十口聚。燈燭五更愁。隴麥春苗偃。溪田水荇流。野人思見日。偶語立沙頭。

送顧叔向之湖南

七月揚舲去。淒淒荆楚游。江山仍接漢。辭賦且依劉。旅興桃源路。鄉心明月樓。雁書衡嶺盡。目斷九嶷秋。

王貴一二首

貴一字象山揚州興化人。

三月三十日



亭樹蒼茫綠。牆花歷亂紅。開樽聊細酌。今日對春風。

送吳甥夢祥入都

古驛風沙送馬蹄。川原極目夕陽迷。搖鞭莫向天山去。望帝經春滿路蹏。

苗君稷一首

君稷字焦冥。一字有郤。永平人。

立秋前二日懷剩公

坐惜秋將至。思君在翠微。山空花自落。林靜鳥還飛。策杖尋溪水。牽蘿挂衲衣。涼風送殘暑。吾欲叩禪扉。

程岫一首

岫字雲家。歙人。有江村詩話。

遺民詩。雲家父懋衡。甲申之變。不食死。博學篤行。守先人之志。與孫豹人。陸懸圃。吳野人交善。吟詠終老。

贈徐鳳麓

積雨消春日。羈人歎暮年。淮流寒照樹。鄉夢夜聞鶻。舊業浮雲外。遊裝短棹前。親知零落盡。去住總淒然。

